

14

T 3210/1432.83

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

陸萬鍾程志字天與生員善屬文好談孫吳

兵法會倭人

萬鍾裹糧赴敵多所擒獲倭攻桐鄉以箠衝城用布拔其箠

又以刀裂布用勾刀掣其刀倭却兩臺上其事授山東泰安

州州判例稅無所取調信陽信陽軍田混淆萬鍾區覈均其

糧陞工部所正遷山西潞安州同知生平耿介不畏強禦適

督府妄殺人抗劾之督府落職萬鍾尋挂冠歸

馮煦程志字賜谷更字元門嘉靖間歲貢生授河南羅山縣

知縣有政聲少精岐黃術邑宰顧廷對擢御史巡按江右患

蠱疾諸醫罔效廷對歎曰必馮生到吾有命耳藩臬星夜檄

迎比至不數劑而愈里中姚吾泉母病極延至切脉曰無虞

也尚可延算十年後如所期一日與張布政大忠宴忽目一優曰此不久活矣越宿嘔血死其驗悉類此既宰羅山置藥厨於公署以療病者全活甚眾歸家杜門不出年七十終

按照舊志皆列方技然曾為縣令因改入列傳

高文登朱志字伯升年十二代父繫獄讀書不輟郡守郭應

奎憐而釋之中隆慶丁卯舉人援河南葉縣知縣創建問津

書院增學田陞山東膠州知州擬歸養忽傳倭警曰是謂我

憚王事也兼程趨之戰守具甚設倭迄不至尋乞歸孫道素

曾孫承埏俱進士

張志道素以平湖籍登第承埏歸籍嘉興

馬千乘朱志字國良號映臺兒時母疾禱天請以身代登隆

慶戊辰進士授江西分宜知縣分校拔湯顯祖為得人陞南

兵部主事歷廣東僉事羅傍山盜賊嘯聚會兵討平詔賜鉞

帛陞四川叅議乞歸十餘年起湖廣叅政廣東按察使黎叛

泛海諭降競泣拜曰此昔平羅傍使君也羅拜乞解海南曠

地數萬畝墾為田賦額以紓廉州珠禁甚峻劉直指欲弛予

民千乘曰民難與賊爭利而賦累無已力持不可滿秩歸遂

不復出

陸萬垓嘉禾徵獻錄叅程志字天溥

朱志作無姓

號仲鶴隆慶戊

辰進士授福建福寧知州兩平倭亂當事上其功

福建通志萬垓遇事

剖决瞬息成案兵興增賦力為節縮歲省金六千有奇客兵更戍創造兵營于城外處之編審圖里折併州城大得民心

鹽價湧貴捕治雖好以通鹽法每暇進諸生
談文在任四年至今稱善政者必曰陸公 歷刑部員外郎

中上書論封事出知廣西梧州府擒洞猺以不殺為功闢東

安西寧二縣廣西通志萬歷七年萬垓知梧州清慎下人政

躬經始百度維新會滇緬大訶遷雲南兵巡副使躬冒矢石

下隴川擒岳罕收叛卒聲振西南擢福建按察使發關白奸

得以有備進山西左布政使調劑貢市得其平尋以僉都御

史巡撫江西去煩苛革問遺課農桑躬教化築圩千頃積穀

百萬兩賑大荒全活無筭甯運歲需回青動費萬計萬垓請

以土青代之民困得甦江西通志萬垓寬易不苟而每事曲

禮發賑全活甚多濱江圩環輒令母老乞骸五疏不得請聞

訃慟絕竟以哀死生平為善不愧獨知施德不靳人感事伯

兄如父年逾五十好學彌勤著知非小鑑十卷季贊挽萬垓

但寄書草萍消息竟何如巨卿

未解山陽恨垂老那堪策素車

沈懋孝程志叅構李詩繫字勿真號晴峯母俞姪七月而生

瘠甚膚清可見五內而啼聲朗暢父奇嚴孝養惟謹三歲依

繼母張五十年孺慕如一日人以為不愧其名中嘉靖壬戌

會試以侍養歸隆慶戊辰廷試二甲改庶吉士授編修陞修

撰甲戌分考禮闈拔沈尚寶璟壬午副考南京拔王吏部士

騏遷南司業往史臣以不離局為貴而呼司業為嫁老女至

南益厭薄之懋孝澹如也尋以南京中式王少方係故相張

居正戚中蜚語謫兩淮運判投牒不赴李維禎孫植皆為剖
 雪懋孝不辯一言退居淇林之上授徒講學晚歲產益落庭
 戶蕭然擁書萬卷日丹黃其間寒暑不輟故博洽近代無比
 有乞文者引紙疾書不加點竄視其紙之長短必竟幅乃已
 其自言曰自二十五歲脫科舉習侍養七年無一日不探羣
 籍故入館時已洞知作者門路在館二十五年朝講修史之
 暇亦無一日不誦覽而力常分五十挂冠始壹意勒一家之
 言而今且忘其衰老矣所著有滴露軒藏稿一卷洛誦編二
 卷石林蕢草二卷四餘編二卷賁園草四卷水雲緒編三卷
 詩集十卷名淇林雅詠子瑞鍾字德培號徵梅嗜古好奇為

文深奧讀者不能句則日喜以選貢知陝西雒川縣不習吏

事尋罷歸著有周易廣筌二卷

載明史藝文志四書贛

孫從龍朱志字化光隆慶戊辰進士授行人三奉使陞左司

副出知江西信州尋轉刑部員外郎陞九江叅議乞歸多勸

留者相國張洪陽云諸公為地方留賢野人為山林增勝出

處盡之從龍凡事簡易惟課子最嚴蔬食布袍終身不厭

陸志孝嘉興府袁志叅朱志字仁卿號浚川隆慶戊辰進士

授南直廬州府推官鋤強釋繫備賑卹民有政聲行取以不

附江陵改刑部主事乞侍養轉南吏部郎尋左遷北直霸州

同知陞湖廣黃州府通判能得士再入刑部一歲朝熱兩審

活者下計歷知江西九江湖廣衡陽福建延平三府皆號神君告歸薦起漳南道不赴著有寓黃集

楊府嘉興府吳志字見山幼從姚江諸燮學偕弟庶稱二難嘉靖壬子舉人隆慶戊辰會試乙榜授北直滄州知州著惠愛移寧州雪陳以朝於獄以朝登進士遂師事府里居好義竭力助城工賴以禦倭修學官濬運塘析邑後利弊因革均資經畫焉著有經書講言醫學搜精

倪壯猷嘉興府袁志叅朱志字華芳隆慶庚午舉人授南直宜興縣教諭陞江浦縣知縣首請復置東葛驛以甦役因邑距江六十里苦飄沒開濬上江新河十五里行旅便之陞南

刑部主事歷貴州僉事紅苗反上勦撫機宜築思南鎮遠諸城添設總鎮平頭印江兩守備兵隨擒苗首石阿四等上救銅八議又請改酉陽四司宜隸黔不宜隸楚皆報可陞雲南副使黔國莊田私徵爲民害請下郡縣代徵著爲令按養馬指揮秦乙清置于法黔國不敢撓會討隴川都安民捷聞賜金加級尋請告歸卜居禹航依先壠以居年八十四卒有救浦救銅平苗平隴合集

洪烝朱志字惟進號鸚洲隆慶辛未進士授河南陳州知州嘗輯治略三十八事除疾苦興便宜織悉曲盡停解京儀馬三百餘匹以折色代又議處河北歲派驛費省數千金吏治

報最陞兵部員外攝曹事事無留尋晉吏部郎中以勞邁疾卒于官有來鶴軒稿

李嫌朱志生海濱少遊黌序有聲好賑貧困排難解紛所至輒殖千金隨手散去殖亦不終落由貢官南直潁州州判以廉能調繁滁州河工告績浩然言歸會邑令劉士瑗丈田之役人莫敢言嫌侃然抗論令怒欲解綬嫌不爲動卒從其議里人誦之

按丈田之役劉士瑗縮小弓式從嫌議之說恐誤

胡士章分省人物考叅朱志本餘姚袁氏先世徙平湖贅于胡遂氏焉士章少不學兄士奇出父木主跪而泣責之遂感

悟兄弟相師友中萬歷己卯舉人授南直太湖縣知縣年餘卽歸割產贍嫂迎養寡姊撫兄子終其身士奇字重之萬歷丙子舉人署江西進賢教諭擢國子博士兵部司務會上怒職方郎某謀舉西寧侯罪充遼東以首輔子故移罪于士奇謫福建仙遊訓導士奇不辯攜一蒼頭抵任居歲餘卒

韓子祁程志叅攜李詩繫字心堯號肖南江西提學弼子萬歷丙子順天舉人授湖廣德安府推官又補贛州教民植木棉勤紡織直指欲以意入人罪子祁不阿左遷興國歲儉發倉賑饑繼以捐俸歷陞南直蘇州府同知三董漕輓俱絕饋遺或勸爲子孫計輒曰老婦守節可中更耶及歸篋中惟書

數卷石刻數種而已生平以翰墨為樂為詩蒼老高潔有醯雞集尤善草書得醉僧遺意

孫成泰程志叅朱志字允交號景蜚簡肅植季子萬歷丁丑

進士授湖廣道州知州州在萬山中民獠雜處成泰俱得其

心市販例輸稅于官一切禁革量移南直蘇州府同知濬治

許浦塘楊林河奚浦水利攸賴署諸邑篆勞心撫字聞父訃

即歸猶及視舍殮起刑部員外五年晉郎中陞江西饒州知

府饒故奉命恤刑地一旦以屬吏見藩臬非體謝不往刑部

尚書孫丕揚躉之疏請著為令改知福建邵武府陋規祛除

殆盡福建通志成泰首崇文教以示造就時大饑六閱月調先賑後請全活甚眾議調時士民赴京保留

繁南直蘇州急正供禁火耗杜侵欺慎那借不令而孚忤上

官拂衣歸又一年補北直大名府凡編派徵收併封起解諸

欸一如治兩郡時又一年陞大名副使勤訓練公賞罰騎射

甲于燕趙復以不諧上官投劾歸產不踰中人稱廉吏云按

詩綜成泰調邵武再調福建鹽運司同知後以按察副使整飭大名道與舊志稍異

馬應圖程志叅分省人物考字心易號廓菴萬歷丁丑進士

授行人奉使歸篋中惟圖書數卷司選者廉其清欲擢臺省

遣人示意應圖曰吾何人斯肯作呈身御史哉遷刑部主事

欲便迎養改南禮部陞郎中疏劾科道齊世臣等并及首輔

乞稽祖制疏臣聞百官不法則言官得而糾劾之言官不言則諸司得而舉正之臣待罪部屬遠在留都本非議論之司

亦識靖共之義况天威不可以屢瀆衆怒不可以再干臣亦何敢越分進言顧見近時朝中議論有大不平而可恨者大抵附臣違主伐異黨同以小人而攻君子則謂之當然以君子而折小人則謂之讒口如陛下之所欲留則羣起而迫逐之如寇讐陛下之所欲去則愛護而深惜之如心腹其意陰有所承附而其言大無所顧忌蓋惟知有大臣不知有朝廷惟知有私意不知有公論累時積日未有一人出而直折之臣竊不勝憤懣以為威福者天子之威福也使陛下之所與者果非其人雖十易之何害然而所用者如李植江東之與吳中行沈思孝天下皆知其名不知其有過也使陛下之所怒者果非其罪雖十誣之何害然而所怒者如權奸張居正與削籍大臣高啟愚等天下皆知其罪不知其可矜也夫何試御史孫愈賢蔡系周論劾太僕寺卿李植波及於吳中行沈思孝株連蔓引竝指為邪至設危言疑事以激怒陛下而科道官齊世臣吳定倚角聲援竝論江東之羊可立不宜奏辨至今中行思孝懼禍引去植與東之可立身蒙大垢又有御史龔懋賢條論時事首引商臣伊尹受命成湯太甲復歸之說以為張居正比况言涉悖逆其腹心任事二條又明與居正訟寃而陰為輔臣行說藏頭遮面冀以熒惑聖聽吏部尚書楊巍覆之言言與罪臣同護字字與宰輔聲說辨為渾

厚中無分辨此可謂知有君父知有公論哉臣聞私交固者公家危相權重者主勢孤羣下雷同非社稷之福今部院科道之與閣臣可謂同矣僅有儒臣吳中行趙用賢與夫李植江東之羊可立數人稍自異耳吳中行趙用賢與夫李植亂係於君子小人之盛衰易以君子道長小人道消為泰小人道長君子道消為否凡前為權奸所害而今為陛下所收者皆賢人君子也近皆以不容而逐退矣中行去矣沈思孝亦必於去矣趙用賢又引疾矣告李植者已三至於陛下行且及於江東之羊可立臣恐諸賢盡逐讒人得志自今以後皆效齊世臣龔懋賢諸人所為誰復抗勵守高不為雷同比周以欺陛下者將見黨與成於下主勢孤於上而張居正昔年欺蔽之禍且復見矣此豈可不為寒心哉為今之計急宜收拾挽回以歸威福於乾斷以正邪藥於今日而後臣紀可明天下可安也臣有三議一曰事權之漸重當議二曰恩賞之太濫當議三曰召對之不廣當議昔太祖高皇帝革中書省罷丞相而以朝廷大政分屬於部院正所以防專權而遏亂源也故當今無宰相之官而輔臣不容有宰相之權先臣李賢對英宗皇帝之言曰六部尚書便是六箇宰相此言最善若今內閣大學士之設止以備顧問叅機密而六卿之事無與焉以故其權未重也一重於嚴嵩猶不過以書刺往來

暗行囑托未聞爍金銷骨如今日者臣之所言亦出於匹夫匹婦之心遊談處士之口威勢有所不能抑青史有所不能掩臣知有君父不知有大臣故敢一申公論以尊朝廷欲求保賢去邪防微杜漸以固萬萬年治安之計而臣身不敢惜也神宗震怒謫山西大同典史事詳陳泰來傳丁艱服闋陞河南封邱知縣惟攜一僕落任年餘復刑部主事疾免歸行李蕭然恬不為意居家非公事不至公庭民有冤抑侃侃白之僮僕二三皆為傭以餬口事繼母孝聘妻有癘疾或勸別娶不聽相莊以老沒不更娶馭子孫奇嚴貴顯人有過亦面斥不少假迨歿幾不能斂嘗自署一聯曰乾坤三畝宅湖海一畸人天啟初贈光祿少卿

陳泰來明史字伯符一字員嶠年十九舉萬曆丁丑進士授

順天教授進國子博士見執政與言路相水火上書規之坐是五年不調南禮部郎中馬應圖泰來同邑又同年生也十三年上疏譏切執政又力詆給事中齊世臣御史龔懋賢蔡系周孫愈賢吳定而盛稱吳中行趙用賢沈思考李植諸人忤旨謫大同典史給事中王致祥御史柴祥等希執政意復連章劾應圖且言泰來為點定奏章帝以應圖既貶不問泰來引疾歸久之起禮部主事進員外郎疏請建儲不報時有詔並封三王上疏力爭

論並封疏臣忝屬春曹見先後堂官惓惓以建儲為社稷計因遵奉明旨

着二十一年舉行諄諄告戒恐有頌激以違聖意今春屆期問大學士王錫爵單車陸馳兼程赴闕謂錫爵必當首贊建儲對揚成命既聞錫爵在朝房與部科諸臣言亦以建儲自任且相約以從容委曲事圖必成及二十二日聞錫爵有密

揭封進臣本部隨於二十四日具題前旨以請次日復聞御
札下閣錫爵在邸手書密揭封繳大小臣工竊意皇上倚任
心膂往復商確慎重大典義無先洩而錫爵不謀同官不咨
禮臣默有幹旋無庸僉議建儲大計定在旦夕舉朝忻忻快
觀之乃二十六日忽聞聖諭下部援述祖訓分析嫡長暫虛
儲位並建三王舉朝詫愕咸謂前以冊立改期今以冊封改
旨前以聒竇拒言今以文義錯言不知前旨自十四年以來
何以不徵祖訓不念中宮而今日始發之是皇上之微權妙
用非錫爵莫能迎合而錫爵此來預窺上意陰陽其說藉口
中宮以捐再來之疑附會冊封以邀久相之寵挾智用數是
誠何心眾口噴噴謂此事非改於皇上而改之者錫爵也臣
實傷之錫爵告君則曰孤介樸忠告人則曰忠君愛國會不
思宗廟社稷倚重儲君敵貴耦尊易生猜忌家丞乳保各挾
私腸母愛子驕炎涼立見忠臣蓋輔所宜夙夜在心而乃以
一揭了事順指恐後畧無引經證古之數陳亟為調擬傳宣
之作用捐昭布之大信貽醞釀之隱憂諛君誤國安所自解
豈錫爵博識多聞見不逮此趙普樞輔再膺遂决帝意王旦
美珠一發旋奉天書今之存登首揆眷錫金綺將無肖類臣
思皇上以密札付錫爵尚資裁度未遽施行儻錫爵能如范
鎮十九上章司馬光六進札子皇上豈不豁然感動而一旦

駕言傳理茂置成命違信臣民叢惑中外乃至遜宋仁宗獨
斷之明耶臣有以知其不然夫皇上不察舉朝之議與四海
之疑而决策於一相錫爵不顧公論之非與萬世之誚而阿
意於一人異日釁成不測事涉難言誰敢厲階必奪禍始此
則錫爵獨誤皇上而同事諸臣皆得有辭無曰天下可愚而
尊寵常有也奈何猶借聖諭之有嫡立嫡無嫡立長二語誇
詡已功而尸其觀望僥倖之謀耶要以祖訓載立嫡之文而
先朝多早立庶長尤為顯據聖諭存待嫡之厚而中宮實篤
愛元子久已著聞長幼之序本明宜及今示以等威之辨嫡
庶之名一定非將來復有轉移之時即嫡嗣繼此而生尚可
崇其退讓惟諸庶相雜以逞更有煩於處分前星朗朗天命
允歸寰海頤頤人心協向儲藩蚤决則友敬兼隆兄弟交
則君親聚順惟我皇上與路王殿下同氣藹然恩禮殷渥豈
非昔年青宮預建藩輔已安之大驗哉臣謂皇上不難改歷
年之明旨必不難收今日之新諭無嫌拂逆在一决斷耳錫
爵既能結皇上之特知亦必能定元良之儲位無委艱難在
一撓回耳杜漸防微實關睿慮持經守正庶免遺譏臣雖卑
賤職在禮官與聞宗社之明禋惟願乞鬯之有主效此悃忱
非沽直譽儻因以孚格聖聰鉞
硃相業斧鑕自甘廢棄無憾

會廷臣多諫者其事竟寢亡

何考功郎中趙南星坐京察削籍泰來疏救帝積前恨謫饒平典史踰年遂卒年三十六天啟中贈光祿少卿著有員嶠

集稿李詩鑿泰來疏爭三王並封時嘗面質王文肅於朝旁觀悚慄卒寢封議等以疏救孫繼謫典史自賦有直道不

緣三黜改孤忠只受九重知句卒於茗川初謫歸夢至一山見羣仙咸集共賦云涼風拂拂白雲收宦海茫茫恁日休剪

紙作驢輕撥刺桃花洞口笑淹留旁有仙曰汝乾凌子也後一年當會於此歿後翁哭之慟適遇方士能作飛符召魂術

翁為祈請附此書曰仙謫之期止此非不思我阿翁然數有

限慟奚為遂賦詩以別生平慷慨有才略與顧憲成趙南星諸公咸氣節自負竟以抗直困下位夫人營織而食後復貶

竄流離以死嗣子無傳陸啟宏讀陳儀部集詩儀部立朝日

十九方弱冠抗疏耀前星志氣何沈悍納諫固嵩高著篇亦

震燦臥龍迴驚波鵬鳥逼柔翰喟焉身後名聊謝無兒歎

屠叔方朱志參構李詩繫字宗直號瞻山論德應竣子萬歷

丁丑進士授江西鄱陽知縣先是遜國諸臣疎屬一丁一地

分戍劇邊一遇絕丁輒行勾補飛符所到冤結二百餘年叔

方之令鄱也適有符勾鄱人胡閏絕丁者叔方憤然擲符于

地曰彼死忠何罪其親屬又何罪使吾有言責必碎首爭之

矣擢御史即為具疏請諡請祠請修治冢墓卹錄子孫及交

遊姻黨之株累編戍者一體赦宥神宗感動蒙宥者千六百

餘人京師張赦榜時忽風發榜飛轉輾天際觀者如市自午

至未仍還故所鄱陽張榜亦然按此事本顧憲成英風紀異錄叔方在臺頗著直聲中忌者外轉山東副使遂拂衣歸著有建文朝野彙編二十卷載明史藝文志

馬維銘朱志字宏衢號新甫萬歷庚辰進士授南直太平知

縣攤二畝三分之稅文科一畝豁黃山虛糧數百頃陞兵部
職方主事督山海關革貂皮稅以艱歸築牧圃于東湖上自
號羸提生著有史書纂略一百卷廣文選二十五卷載明史藝文志
羸提編池塘草無子嗣子德澧有傳

陸長庚獻徵錄叅朱志字元白號津陽萬歷庚辰進士初授
大安州知州連遭父母喪未任服闋補南直廣德剖決如神
釋冤獄六案奉部檄加派以庫貯餘金抵補民間不知溢賦
丈量後浮額萬餘畝核實改冊不以累民裁革緞價銀四千
餘兩徽寧援例並裁一萬六千有奇禁北鄉煤山免採貢州

人德之立生祠于橫山

江南通志長庚居官廉敏置學田新
巖宮設尊經閣首德行而次文藝課

農桑濟溝洫建倉水陽以便軍民時有竹
一本二幹有蓮並頭產于州署人以爲瑞

陞刑部員外勘巨

瑞邢尚智獄執法不徇改南吏部歷郎中出分守鄖陽叅議
分巡下湖南道覈長沙屯糧侵蝕歲得三千六百餘金裨軍
需中使陳奉所在荼毒廉其司房沈自問等十三人置之法
轉廣西桂下道搖首韋扶仲盤花婆作亂府江震驚屯土兵
三萬餘餉往往不給長庚建議撤之督府有難色長庚曰賊
據險不出雖兵百萬無益奈何令缺餉坐譁乎願勿中制搖
易與耳遂留兵三千守荔浦城餘盡撤去賊果懈防守長庚
密授副將童元震方畧夜至白馬冲襲獲其妻女募猾猺十
人誘扶仲出劫遂墮我伏中力戰脫去則荔浦兵已扼其歸

路分道要擊擒之盤花婆亦授首餘黨悉平詔賜長庚金綺
晉爵一級播酋楊應龍反陞湖廣按察使移治上游提兵扼
水陸倅斬于計應龍被擒復賜金綺如初進江西右布政轉

左請捐南昌府門稅改折京絹民困以甦

西江志時宗祿不給宗屬千餘人謀

于衢兩臺束手長庚出存積銀十三萬補之三十六年大水
請弛長河魚禁以卹饑民建唐韋丹耑祠重建攬秀樓在任
七年羨餘悉封簿貯庫
士民爲立祠章江門內
陞應天府尹司庫者進所存羨金累

萬却之判歸徐鼎燹等被奪蘆洲二萬畝進南通政時留都

多私鑄官幣廢格長庚抗疏上聞

錢法疏竊照私鑄銅錢與白晝搶奪之禁載在令甲

法典具嚴凡以捏利權昭國法也南都私鑄公行官錢阻格
節經科臣及工部題覆奉旨錢法關係國計若私鑄縱橫爲
害不小依擬嚴行禁緝仍附入考成不得違玩欽此然而禁
網疏濶姦宄阻撓春初五城衙門纜一申令輒囂然聚閩打

搶舖行數家幾爲罷市挾制仍行私錢而後已於是局厥所
鑄徒充捨支之用負販而出一錢不市於都城而私錢濫惡
遂成極重不反之勢該南京福建道御史王萬祚疏稱姦鑄
蕃興官禁掣肘乞收利權共伸國法隨經下部覆請候旨聞
諸臣俱向臣言應天府宜照例鼓鑄臣以爲鑄而不行於市
雖鑄何益故私錢不戢則官錢不得通然官錢未行則私錢
何由止而止之以漸行之有權爰與部科諸臣及捺江丁都
御史各道御史往復商議於八月二十八日出示酌行一約
謂國家設局鑄錢專爲便民行使而私錢低假薄惡到底騙
害良民本府與城內外行市居民約不遽革私錢以行官錢
亦不裁減物價以行官錢聽民擇便而自爲計制錢每千文
只定價銀九錢如各行貨物及蔬菜菜腐之類原賣私錢十
文者今許仍賣官錢十文其私錢酌量或二十文或十五文
折筭以示有用無用之別舖戶經紀願赴本府領兌許以銀
八錢九分兌錢一千文本舖如有存下未盡私錢聽照行使
折數兼搭兌換錢盡而止若架上私錢倍於官錢者嚴究如
律此在百姓自己回頭省悟不令利歸私鑄害種民間如是
而擇罔姦徒尚敢煽惑殃民偏用私錢如故則律禁具在官
府一切繩之以法不復煩文告矣等因又經知會各衙門擬
請戶工二部將見在鑄錢廣發舖戶以濟行用之所不給一

時城市官民翕然稱便丁都御史過臣亦云詢之父老咸謂制錢從此可通私錢從此自戢但目前急務要在廣鑄官錢當時鋪行經紀凌應鴻等兌去官錢百萬有奇三日之內貼然無譁不意九月初三日午刻忽有一種遊手無賴強將低錢照舊價勒買貨物忿其不從乘機搶奪鎮淮橋絲市巷單牌樓筍橋地方油鋪鮑震程一所磨房酒坊屠朝寵黃芳等各家毀其房屋罄擄其財貨酣飲狂奔闕動街市觀者如堵臣從拜客回還相近中城兵馬司前見其羣聚大街乃借蔣都司家筆硯出牌曉諭衆方徘徊觀望且却且前俄而丁都御史適以拜臣會遇好言慰諭展復鳴張蟻集招搖不散薄暮總捕坐營官以夜巡傳呼而至聲言擒捕若輩忽鳥舉獸竄一闕而去臣與丁都御史揖別登輿各歸本衙門而明日私錢之行亦復如舊矣究竟不為私錢不為物價不係居民全是喇虎散潑流徒藉口乘釁以肆其打搶之計而一二私鑄巨姦從中陰喚陽煽特借以行其阻撓之術即以三尺在前恬不知懼甘以身試法而要挾肆行昨午部覆謂姦徒畏法之心不勝嗜利之心彼此因循未嚴必然之法及今不禁後將何極誠見其微也今南都豪猾把持太阿倒置甚矣夫至於法不必嚴驕養姑息究且將使私鑄搶奪之律弁髦棄之耳主權日下國禁不遵假令狡焉思逞事更有大於此者

尚可言哉伏乞皇上之允部覆前疏專責當事臣工亟圖廣鑄行使肅法弭姦毋令坐視凌替隱憂潛伏而不可解至於臣不量輕弱欲以咫尺之示消姦鑄而挽重權而反以中奸囂攘奪之故智臣罪一也又不能明申國憲直革私錢而猶令自通自塞委曲以濟其法之窮臣罪二也不善行法而卒被其撓法萬一後來以臣為口實一任縱橫而莫之敢問或遺廢法之憂臣罪三也則臣滋懼併乞將臣罷黜以為不知規隨避事妄意維法利民者之戒國典幸甚臣愚幸甚

時貴意遂乞歸奉旨慰留尋進兵部右侍郎忤者忌甚即日乞骸骨疏再上得請優游林下二十餘年撫按七薦不起著有老子元覽二卷南華副墨八卷陰符經測疏一卷周易參同契測疏一卷方壺外史八卷楞嚴述旨十卷載明史年七

十八卒崇禎甲戌俞禮臣陳子壯請賜祭葬

王建中朱志字維新萬歷丙戌進士累官叅議家居後日夜

誦讀兩目皆赤老而好學遺集最富為人所竊今不傳

戈用泰分省人物考叅朱志字來陽號晴寰萬歷己丑進士

授北直涑水知縣邑素衝疲稅監四出又水旱為災用泰悉

心撫字復里甲省徭役疏通鹽商訊釋無辜採石開礦皆以

身扞民即上官怒形于色亦不顧歷南刑部郎中念父思齊

年高即乞歸終養服闋廷推者再卒不赴里居閉戶寂靜著

有晴寰文集若干卷適軒詩集五卷

陳九韶程志字宗舜萬歷己丑進士辛卯分校北闈任刑部

郎中出知江西廣信府會中人潘相開礦擾民九韶繪圖陳

疏得寢民立祠祀之尋擢九江副使陞湖廣叅政卒通顯二

十餘年服食如寒素伯兄早世撫其子如已出歿數日推陞

貴州按察使

馬明瑞朱志字道楨萬歷辛卯舉人以母老謁選上虞縣教

諭陞北直景州知州多惠政艱歸起補山東德州頒行八禁

築堤防賑饑陞工部員外時廣寧失守督造軍器稱旨紀錄

中忌罷歸明瑞善畫竹有文與可遺意

賀燦然程志字伯闇號道星耑精博古諸子百家窮微抉奧

不以涉獵為工登萬歷乙未進士授行人擢吏部主事屹然

不可干以私歸踰年起員外會內計中旨留一二言官上疏

極諫語侵柄臣神宗震怒旋削籍與劉元珍龐時雍同日出

都門一時仰其直節里中利病侃侃持議爲鄉邦倚重著有
備荒議一卷

載明史
藝文志

六欲軒稿十八卷

陸錫恩程志叅朱志字伯承萬歷乙未進士授江西萬安知
縣時礦稅起有以回青石膏利啖中人者錫恩械之計令黠
者發土土皆硃砂議遂罷三邁水旱首議改折民賴以甦縣
故設戍卒備賊守弁牟削太甚士伍譁縛弁將甘心焉錫恩
單騎馳問狀下弁于獄旋諭隊長杖倡亂者一軍帖然陞刑
部主事妖書禍作罪人旣得當事猶持兩端錫恩出一言定
之四明當國欲見不往蕭司馬楊少宰懸職方儀制缺待之
皆力辭以故四明去錫恩雖浙人超然獨免丙午典滇試所

取士登第獨多明年以讞獄歸里又三年而卒年四十二後
贈刑部員外錫恩性瀟灑嘯歌談諧不矜崖岸晚病益厭功
名放情山水時人目之爲達自爲壙撰墓志號夢蝶居士又
號癡大夫癯丈人皆自爲傳詩法陶韋有雙鳧草傳書堂集
子澄原有傳

陸錫命嘉興府袁志叅朱志字仲敬性至孝母卜氏晚年病
目吮之復明以例補內閣中書山東災御史往賑錫命捐穀
千石佐之存活無筭御史上其事特勅建坊旌之生平扶災
卹難親友待以舉火者常數十家率厚息稱貸爲之又捐田
百畝于家祠以贍族以子清源貴贈御史清源有傳

馮伯原嘉興府吳志字起寰萬歷中以拔貢授上林苑丞陞廣西鬱林知州有惠政忤當道意歸里隱居徜徉山水間

施時圭朱志字念同萬歷丁酉舉人少時貧不能振意豁如也計偕後就南直太倉州學正陞儀真縣知縣儀真多鹽販

時圭至鋤其魁奸徒屏跡擢湖廣武昌府同知慨然曰武昌臨漢口盜賊充斥奸吏相仍積賄養害官為盜首吾何忍哉

力辭不就而歸

金汝礪朱志字啓心萬歷戊戌進士授福建福安知縣有清譽多所規畫陞南工部主事督錢廠綜核廉明積餘錢于萬

計管理節慎庫省浮額二十萬奉旨紀錄權龍關稅正課外

奇羨數千金白大司空貯公帑佐緩急管理屯田裁板枋脚

價數千金中貴人齟齬之不為動江南水潦淮東亢旱條上

救荒事宜著荒政錄出知北直真定府抱病卒汝礪天性純

孝父母有疾藥必親嘗溺必躬掖著有昭性錄策學

趙維寰浙江通志字無聲舉萬歷庚子順天鄉試第一署海

寧教諭陞南國子監丞擢刑曹轉郎中歸為人負氣所至不

肯依阿為監丞與大司成不相能欲挂冠司成謝之乃解居

刑曹既疏劾撫寧侯朱國弼罷之據實駁正疏臣按南京守

一業受姦民徐仲投獻至撓臣職掌殺人三命臣係原問官
誼難隱忍因於上年十二月初四日具疏直糾會臣堂官姚
士慎齋捧在都見臣揭帖阻疏不上而國弼偵知臣疏之見
過也輒捏情誣讟為先發制人之術伏蒙皇上嚴旨切責國

弼而以臣所被誣者即勅刑部查明燭姦之明遠徹萬里臣以祇宜靜聽矣惟是國弼四揭臣未已而復重以疏有不殺臣不休者臣一生孤立不畏疆禦不借黨援寧執法而死於國弼毋寧減法以負皇上敬首質縱差嚇詐事復明旨而徐及其餘為國弼駁正焉竊照臣部十三司每員差皂五名設有定額勒在部誌若胡立者非但臣司五人無此名徧查十三司並無此名也及查院案廠案乃知其為崇禮坊爵字舖總甲總甲可謂臣差人乎且差人嚇死人命公然不懼不躲而復挺身徧報廠院抑何壯也此臣所不解也其二曰陳氏一陳氏耳據疏則應死橫墩洲據揭又應死南京城內如死城內宜在六月之杪如死洲所宜在八九月間地遠二百餘里時隔數十餘日且告廠院日蕭之龍登時打死告國子監又曰蕭之斗擒至寓所辱死其論臣又曰縱差胡立嚇死及查胡立原報呈則但曰孫四妻與伯婆喚口縊死是何一人之死而地屢易時屢更狀屢變也此又臣所不解也其三曰違制臣所行之詞奉堂官批發也堂官之受詞奉皇上三年分旨前部堂熊明遇題疏也而硬執為臣私准手本不知所憑何卷案所據何筆跡世豈有千六百金之交易而以一子本告官者違制二字臣不受也此又臣所不解也其四曰越組蘆政自有專司國弼嘗以是詰臣堂官矣堂官駁之曰蘆

政固有專司投獻律例刑曹亦有職掌國弼爾時何無一語裁答而今乃謂臣越組不知所越何組如國弼以守備撓臣部職掌反非越組耶此又臣所不解也其五曰囚禁徐仲以未明產業投獻勢豪律宜永戊臣忝備員法司即果悞禁此囚亦無大咎况堂詞以二十一日到仲以二十三日召保至二十六日而國弼搶仲去矣搶在三日內而曰囚禁兩月此又臣所不解也至若蕭如益者臣官南雍二年查冊絕無此生頃因國弼疏訊之則原納北監其歷滿在癸亥耳臣時尚未謁選也通財雖義所不禁惜南北監不能易置耳雖然誣臣猶其小者臣近讀國弼一揭云功臣田土載在勅書除欽賜外其餘但有田土悉聽管莊人報官入籍臣讀至此竊疑聖祖即篤厚勲臣何至開其不遜之漸急取會典明律證之乃知聖祖遠慮防其子孫跋扈怙勢隱糧故嚴以入籍起稅之律而國弼故認入籍取利至刻揭以籠駕愚民若欲取率土而共之者彼其稱兵境外既抄搶於無為州又抄搶於秦興縣殺人放火了無顧忌有繇來矣總之臣與國弼蘭棘梟鷲勢不並立今蒙皇上即屬刑部查臣臣不患查之不明竊患查之不廣未足以服國弼也臣本刑部司官以堂查屬雖公亦私徒資國弼之口實耳尚懇皇上悉如國弼所請嚴勅南京九卿科道從公會勘要見總甲胡立是否臣司差皂陳

氏蕭之龍曹如瓊三命確係何因致死臣奉行堂詞是否違制越俎法司罪犯國弼應否強搶監生蕭如益確係南監北監通財有何確據併勘國弼借勅書以關土果否刻揭現證其激變事情召問兩地居民是否鳴金放砲矢石縱橫確是何等景象毋徇情面毋主調停毋謂臣官卑而易與毋謂國弼豪勲而難犯事事不輕放過件件直窮到底臣虛即黜臣國弼虛即罪國弼一刀兩段毋持兩可庶魑魅無從遁影而賢姦不淆定論矣為此具疏併將原疏封呈御覽復與

大司寇甄淑訐奏并及御史劉之鳳以其沮格已疏也坐是

奪職杜門著書以終橋李詩繫維寰形貌短健有相者曰子骨法孤貴宜以文霸貢入北雍中庚子

解元以文格太奇被參及卷進呈神廟御批云其學則辭其思則苦復歎曰異人也白是聲益藉甚入禮闈多士皆翹首拭目爭識其面後以小臣

屢訐罷歸年八十一卒

馮元鑑朱志字三峩萬歷庚子舉人授南直合肥縣教諭陞

四川涪州知州乞歸結廬雙谿之濱生平高雅善文尤工書

法有雙谿草堂詩集

曹徵庸程志叅橋李詩繫字遠生一字平子號積雪中萬歷

戊戌會榜辛丑成進士以族人誣謫陝西宜川典史陝西通志

徵庸博覽宏辨造就人材遷延安府推官入為大理寺評事歷刑部郎中

審錄江西平反枉獄數百人知山西汾州府著有成績以病

去官卒于孝義官舍徵庸為人清疎雋遠有潔癖避俗如讐

每葛巾芒屨自肆山水間所著客語二刻廣陵遊記冰雪軒

稿聲情筆墨著紙皆韻湖中博學好古者長水太史以還其

流亞也書法亦遒逸為世推重

金汝諧程志叅嘉興府袁志字啓宸萬歷甲辰進士授南直

婺源縣知縣鋤豪右緩催徵以治行擢御史前後章數十上
 俱官府大事不顧忌諱援劉光復劉文炳叅吳道南李三才
 及織造御馬諸監尤人所不敢言一時稱真御史著有歷代
 名臣芳躅理學訓西署疏稿

過庭訓朱志字爾韜號成山萬歷甲辰進士授湖廣江陵縣
 知縣首減羨金贖鍰奸胥屏息邑際大江有淤田數萬畝為
 楚藩漁利庭訓履畝清丈悉歸諸民酌量起科減通邑稅巨
 豪恃銓部戚擁眾塞江口為亂其勢張甚庭訓需其懈密遣
 吏誘致豪立答之下獄眾遂散湖廣通志庭訓為治主于安
 靜凡院司大政大疑大獄下
 郡縣則集紳士于庭詢之或親造其門以是邑無缺事陞雲南道御史疏請融我見酌

虛平截然有中立槩又請宥纍臣滿朝薦薦廢臣鄒元標趙

南星史孟麟等乙卯挺繫事起眾論異同疏請釋猜疑

請釋猜疑

疏竊惟天下之患最不可為者名為治平無事而其實有不
 測之憂第不測之憂多不生於外而生於內生於外者如水
 旱盜賊之災強藩驕寇之禍其來也有形而其禦也猶得
 隨機設策生於內者如左右近習之奸官闈几席之變其來
 也無形而其禦也易至倉皇失措故曰涓涓不止流為江
 河醞醞不息至於燎原言禍機之所伏也又曰不見其形願
 察其影言防患之當預也年來災異疊見邊報屢聞推補大
 僚之疏不下而九列空候補考選之疏不下而言路空推陞
 司道之疏不下而藩臬空至都察院之印務經月餘而尚無
 着落畿輔各省之按差屢催請而杳無音耗紀綱重地激揚
 重任屑越至此皆從來所未有顧其事體雖出非常而幹旋
 總曰轉念在皇上一舉筆間而已惟是禁門之防衛日疎而
 不軌之亂萌竊發如近日張差之事實關宗社之安危駭中
 外之聽觀皇上尚可泄泄而不將諸臣之疏一為檢發提究
 乎夫慈慶宮可入何宮不可入木棍可執何物不可執據其
 見犯之罪即時梟首已有餘辜且更多隱伏之情一人處死

未為盡法皇上二十年以前諸臣以建儲之一事爭十餘年
來諸臣以之國之一事爭未幾而建儲之事定又未幾而之
國之事定斯其神謀睿斷原係皇上所獨持則今日之變起
蕭牆而禍生肘腋尤皇上所宜亟剪其見犯且永杜其將來
矣夫諸臣或以瑣屑入告或以風影竇聽宜有以致皇上之
厭薄而槩多留中此何等大事且情形有據又非風影之比
若仍懷厭薄而疑之為不足信皇上之自為社稷計者其謂
之何年來人言藉藉大都謂天性至情睽違既久隱伏窺伺
實繁有徒官闈之中當有不測之變故職初未之信今不幸
疑而中矣猶幸社稷有靈謀而未遂故尚得正法以杜將來
也且聖衷寧有偏愛而人情實多猜疑其積漸蓋有自來職
請悉其槩福王之就國會未踰年而駭擾幾半天下固引誘
之非人而其隨人撥置之品局已自可見皇上豈不燭照而
數計乎乃事關福王者百求而百應事關皇太子者屢叩而
屢稽從來驕奢淫佚多生於寵禍之過而大有為之事業率
從艱難困苦中磨練而成故以姑息為愛者其愛小而以義
方為愛者其愛深則百求百應似乎以姑息為愛而屢叩屢
稽未必不以義方為愛也皇上胸中之涇渭固自了然而大
小臣工與中外愚民其誰諒之語云雖有良玉弗琢弗成其
為美雖有穎質弗學弗成其為聖皇太子仁孝聰明令聞固

已夙著而詩書禮樂講習未免久停皇上若以義方為愛不
應玩愒乃爾至於誕育東宮之貴妃而贍田不給以得配東
宮之郭妃而葬地不擇尤情理所未有中外所共駭者蓋皇
上以止慈之人父不無重彼輕此之舉動皇太子以久定之
國本未蒙與此加彼之恩施此在滿朝臣子且求之而莫解
其故欲挽之而苦無其術則荆軻聶政之徒乘間而發者履
霜之漸已非朝夕之故矣藉令庭闈之真愛藹然金華之講
讀如故而贍田擇地等事諸臣屢疏催請者皇上蚤賜檢發
何至妄生揣摩漸行壽計大內遂密之中有如此之亂萌哉
此正皇上見形察影之時而失今不挽將有滔天燎原之患
矣伏乞勅下法司將張差嚴行究鞫併查主使之入一體速
正典刑而出閣給田擇地等事速賜檢發舉行至於一切左
右防其離間百凡護衛加意添查俾疑根互釋而亂萌永杜
則於皇太子為止慈於聖母為止孝於中外臣民又為止信
矣中外推服巡按屯馬福藩乞改備邊子粒為莊田抗疏停

之丙辰賚帑金賑山東饑條陳荒政事宜皆確實可行泰安
安邱饑民嘯聚庭訓肩輿詣巢諭之悉羅拜投戈感泣又請

截留漕米四十萬石備賑于是巨室競出宿儲穀價頓減仍具疏以漕米歸部天啟辛酉督學南畿楊瓊芳陳名夏兩會元皆首拔士也轉湖廣叅政福建按察使時魏璫焰熾庭訓恬守外藩隻字不入輦下陞應天府府丞未任卒崇禎戊辰特恩予祭加贈府尹著有直省分郡人物考一百十五卷明載

史藝文志 聖學嫡派性理翼明行世周積賢題庭訓山左賑荒圖詩神皇久治多宴安耄勤荒

政開畿南飢民枕藉自相食二東白骨堆邱山成山先生西臺老壘書趨召登金鑾至尊自把天栴餞太府還將國帑頒臨軒慘淡承天語千里寒帷逸膏雨手調餽粥哺孱兒口啣

藥草塗瘡痛自是蒼生得更蘇萬戶費烟同日起男生呼作過公兒女生呼作過公女此圖一獻天顏開勅付蘭臺傳信

史三十年來事反覆故老啣恩猶夜哭御史府中烏正棲京兆堂前草徒綠嗚呼丈夫有

志能齊時不作三公意亦足

劉廷元朱志字方瀛萬歷甲辰進士授廣東南海知縣邑濱

海田少賦繁以八分科畝廷元請覈實民賴以蘇擢陝西道

御史負氣敢言疏請東宮講學請遣福王之國并劾福府莊

田踰額非制又奏劾東廠盧受稅璫高案等不法狀皆侃侃

有聲甲寅巡視皇城兩奉勅按畿輔光宗時降三級調用里

居三年起太僕寺少卿歷南左都御史兵部尚書莊烈帝卽

位改工部尚書尋罷歸己巳京察論戍贖為民庚午卒於家

從弟文元由歲貢生為江西袁州府通判有清政

姚士慎朱志字岱芝九歲能屬文中萬歷甲辰進士選翰林

院庶吉士改吏科給事中疏諫開礦忤旨謫福建福州府經

平陽縣志 卷九
歷累陞光祿寺卿丁艱起大理寺少卿論救給事中惠世揚
疏云附閣之黨所宜早定爰書擊逆之忠豈可尚稽恩典一
時傳誦焉疏上世楊得出獄奉勅推勘魏奄奸黨以六案定
罪執法不徇由通政使轉南刑部尚書遂致仕歸徜徉湖山
以詩酒自娛常戒子弟從儉約曰時事方艱矯侈益以速禍
丙子卒予廕賜祭

胡士相朱志叅西江志字端甫號星海萬歷甲辰進士授江
西弋陽知縣縣故多盜士相嚴保甲法盜風頓息歷陞刑部
主事丁外艱起補工部分治張秋北河性善潰汶濟諸泉易
枯土相經營往來清復水櫃疏源滌流堅築隄防爲治河功

最璽書褒美比之宋禮白蓮賊起士相嬰城固守城賴以全
陞江西叅政分守湖西道奸民請開礦部檄至士相覆寢其
事衆建魏忠賢祠獨持不可請蠲袁州積逋建義倉修城堞
興學校奉旨賜金增秩廷推廣西按察使丁內艱歸卒

施鳳來朱志字羽王號存梅先世苕溪人後徙平湖六傳而
鳳來生萬歷丁未會試第一廷試一甲第二名授翰林院編
修庚戌分校癸丑疏乞終養乙卯丁內艱戊午起南司業庚
申陞中允辛酉陞諭德兼侍講學士管理誥勅壬戌復分校
癸亥陞少詹甲子轉正詹尋陞禮部右侍郎直講筵乙丑轉
左侍郎掌翰林院事丙寅晉東閣大學士丁卯晉階太師中

極殿大學士吏部尚書戊辰會試正主考連疏乞歸賜銀幣
廕一子尚寶丞馳驛遣行人官護送還里己巳京察冠帶閑
住鳳來入政府時璫勢張甚一以鎮靜調護爲務中使李明
道欲僱民船轉運奏寢其議修撰文震孟疏語激怒將逮治
鳳來從容廷辨且述緹騎逮周順昌激變一事感動熹宗復
密揭申救以免皇極殿工成魏忠賢敘功加爵賞鳳來力引
祖制非軍功不可而旨從中降乃力辭恩廕不受莊烈帝初
忠賢伏法有攻論當時同事閣臣者鳳來引陳平周勃狄仁
傑以自解帝優詔答之遂力求退當熹宗不豫鳳來力請召
信上侍疾既宴駕卽請中宮懿旨馳召信王璫議欲停梓宮

于乾清信王御殿廡鳳來請御文華殿如世宗故事上表勸
進論者比于李東陽之事武宗云子日升孫鉉檇李詩繫日
升字叔允號抑菴承蔭補內閣中書冊封長沙王却贈金晚
爲湖中耆英領袖卒年九十三著隨囂蠹餘草使楚吟燕河
漫錄等集鉉字公遠以恩貢任義烏訓導奉裁補平陽以
母老乞歸居喪哀毀庭產芝草人稱爲孝感云

陸鍵朱志叅西江志字實甫號開仲江西巡撫萬垓子萬歷
丁未進士授江西建昌府推官署南城縣事革陋規均糧里
甦馬政清漕運士民頌之南昌臨江撫州各議置旴江書院
集諸生肄業其中捐俸課文更給贍田爲永計行取候命彙

輯累朝名公奏牘成帙未梓卒著有尚書傳翼十卷

載明史藝文志

四書傳翼行世

徐調元朱志字相之萬歷丁未進士授南直南陵縣知縣南陵巖邑乘傳無虛日值水潦調元便宜築圩壩頻歲飢疫捐俸施藥糜全活萬計乞改紹興府教授先行誼後文章越士嚮風陞國子博士歷刑部郎中出知江西廣信府道卒

馬德澧嘉興府袁志叅朱志字澹真號以容萬歷丁未進士乞改南直寧國府教授士子以贊見赤頰謝之時捐俸周其貧者轉國子博士歷刑部郎中挺擊事起德澧與王之案意合降旨及慈慶宮引見御史劉光復以陞呼觸上怒下獄欲

坐震驚几筵重辟德澧據律改擬奏對失序宜薄杖神宗謂其曲庇降山東鹽運司運判中途候旨至揚州卒光宗登極子嘉柱詣闕上書訟父寃得贈太常寺少卿嘉柱廕授光祿嘉柱字擎臣歷刑部員外疏糾御史踰冬至日行刑有直聲孫紹曾有傳

按德澧於順治十八年以紹曾贈工部侍郎故封贈門人國朝其傳仍列前明凡前明人而受

國朝封典者倣此

曹孔榮程志字豫仁號明寰以貢授南直天長縣知縣會洊饑瘞死療疾立輸穀墾田諸法月朔望進諸生講學翕然嚮

風服闋補北直雞澤縣俗好訐訟多方禁戢邑久無志孔榮
創修之罷歸二十載泊然邱壑忽一夕無疾沐浴而逝

劉希夔朱志字虞章以貢授福建連江縣知縣調繁齊東地
荒瘠招輯流亡給牛種勸耕治行稱最著有綱鑑纂要行世
周翼明嘉興府袁志參朱志字季醇號廷璋少習韜略中萬
歷庚戌武進士授衛鎮撫陞昌國備倭賈舶飄洋至貪弁欲
借爲功翼明持不可遂被讒歸歸二年幕府檄署金盤復署
臨觀倭犯温州翼明提兵由大洋抵莫山逐之撫順失守徵
兵浙江諸弁縮朒莫敢往翼明慨然請行以浙兵副將充大
將軍劉綎部右翼先鋒時翼明到才二日四千里重趼兵不
得休息隨綎出寬奠次深河力戰克牛毛馬家諸砦爲

大兵所乘四面被圍千總死者三人士卒死者千五百人翼明

突圍出尚二千餘人上青石嶺或勸之逸厲聲曰汝止吾不

死非壯士也遂戰死年四十三賜祭葬贈都督僉事建慰忠

祠按祠今無考予春秋祭蔭子元起乍浦所百戶世襲

按翼明與康承爵朱張兩志編忠節今忠節不另列門改
歸列傳至傳中次深河云云從明史劉綎傳訂正

康承爵九山志叅嘉興府袁志字德徵號翼寰殉難百戶綬
之曾孫也幼習舉子業嘗讀漢書馬新息侯傳至馬革裏屍
句喟然曰先生差矣身旣許國裹革奚爲後登萬歷庚戌武

進士授衛鎮撫累陞神機營遊擊清勾羽林軍勲戚欽避時
 魏璫用事承爵力求外補出守廣東破惠州山寇葉文林海
 寇劉香等轉廣西潯梧參將平龍山賊胡扶記有功崇禎初
 分守台金嚴破海寇張宏銘于大陳山又破之于韭山捷聞
 陞貴州副總兵進後府都督僉事未之任遭闖亂歸乙酉

大兵下省郡邑民團聚鄉勇承爵主之七月二十三日死于西

門外常平倉前

宋景闢者舊詩一姓不再興稱兵仍四起但驅市人戰孰呼男兒死維公捐頂踵殘骸沒

荒壘在周為頑民于殷亦義士西關風雨辰啾啾哭舊鬼

沈萃楨朱志字君聚號哀中與弟杞楨同舉于鄉萬歷癸丑
 進士授工部主事權荊州關稅盡革諸小稅名目以羨金築

堤沙市避水衝民稱沈公堤歷南兵部員外郎中出知南直
 蘇州府舊派福府白糧詔令協濟五年至是已七運而部文
 未止萃楨竟格不供蘇民便之歲大饑諸惡少屯聚劫掠萃
 楨密擒首事三人斃杖下倉卒間遂定識文震孟陳仁錫于
 未第時親詣其門修主客禮天啟二年舉卓異天下第一錫
 宴禮部陞福建副使備兵興泉紅夷犯銅山直侵中左萃楨
 即日移駐同安身冒矢石出奇兵撓之五閱月而就款轉本
 省叅政職驛傳以親老乞歸當萃楨守蘇時吳江知縣曹欽
 程賊私狼藉以淫刑博強項聲巡撫周起元幾為所惑乃列
 貪跡注下考上之起元劾欽程落級及魏忠賢亂政欽程貪

緣復官乘機報復鑄萃楨三級崇禎元年刑科給事中張國
維極論欽程罪惡中有叅清正府官之語帝問府官何人國
維以萃楨對且曰萃楨爲曹欽程所劾則其人可知與周宗
建等諸正人爲伍則其人又可知得旨原職起用補湖廣叅
政備兵岳州尋陞湖廣按察使備兵蘇松以疾不赴復補福
建按察使備兵福州時山海寇盜叵測巡撫鄒維璉新任未
習閩事投誠者意頗觀望聞萃楨至皆曰沈公來吾屬無虞
矣遂委心歸順危疆以安賜金加俸一級尋陞湖廣右布政
使仍備兵蘇松復以親老乞歸尋卒子日昆柘上遺詩字以
白號九掌崇禎己卯舉人順治初授縣令尋改教諭卒位不
稱德時論惜之

按明詩綜萃楨遷福建按察副使以叅政分守蘇松道坐
劾吳江知縣曹欽程罷尋落職起補湖廣按察副使朱志
本沈氏家乘所載陞遷與詩綜微異今從朱志

馬鳴寔嘉興府袁志叅朱志字國聲號具嚴萬歷癸丑進士
授福建閩縣知縣字民慈愛嚴禁豪猾得輔臣葉向高家奴
不法狀杖之曰以天子命吏扑宰相家人卽挂冠不恤也因
投劾改教後歷福建邵武府知府會魏忠賢用事同年友崔
呈秀以書招峻拒不答調河南副使治河有聲李自成圍信
陽鳴寔治火器拒守十數日賊始去轉南直常鎮道陞尚寶

司卿乞假歸居鄉稱長者

陸懋功嘉興府袁志叅朱志字紀常萬歷乙卯舉人署新昌

縣教諭葺學宮搜剔隱漏義田歷陞南工部主事管理器皿

厥鑄務疏叅誤鑄奸商章臣史永壽等提勘戍杖如律夙弊

一清事竣紀錄出知四川保寧府時賊氛已熾州縣多被陷

懋功至繕治城守增設梁山關敵臺有捍禦功杖殺悍卒觸

巡撫怒拂衣歸甫就道賊入境

毛湛朱志字修之應銓子萬歷乙卯舉人選南直婺源縣教

諭介然有守陞南京監丞歷刑部郎中奏獄平允邸舍蕭然

百寒士卒於官

陸府修嘉興府吳志字採禹萬歷戊午舉人受業于從祖志

孝以文行重于鄉授諸暨縣教諭創修學宮擢南直松江府

通判署府事剔除漕弊禁革羨耗陳繼儒為撰碑記晚年歸

里卒著有詩文集葺蘿志行世

陸之禎朱志字筠修萬歷己未進士授工部主事督通惠河

稅有廉聲乙丑視學江西謝竿牘嚴請託所拔士如黎元寬

熊文舉羅萬藻楊廷麟陳際泰等皆卓然以文章名世是秋

豫聞得百二人皆出正收主司倪元璐試錄序中雅重之晉

福建按察使入覲條對甚悉通鑑紀事本末辛未正月入覲

日海上官兵肯出死力有司團練鄉兵多設火器以守為戰莊烈帝問備禦海寇實計之祺

勦之不難今鍾斌與鄭芝龍勢不兩立七月間斌擾福州撫

臣熊文燦計誘往泉州前聞撫
臣同芝龍討賊修其兄賊遁去
 轉河南河道兼右布政使值
 荆隆口決力塞之以衛漕費省而功倍所著河道備考規畫
 周詳尋轉左引疾歸起補陝西左布政

國初轉山西布政念父瑞銓年高乞歸終養里居四十年故舊
 親黨緩急必周無幾微德色晚年尤好學熟于古今典故晨
 夕手編自娛遇家課必製一二藝為準式卒年九十三有滋
 樹軒詩文集綠雪齋小題前後集子瑤林瑋林各有傳

陸懷玉朱志字石含號獻之萬歷己未進士授工部主事督
 臨清磚廠飭材庀用卓然有聲晉郎中董三殿工竣例擢京
 秩因不謁魏忠賢出知南直鎮江府廉靜嚴明郡大治歷湖

廣武昌道轉鹽法叅政商民戴德建祠尸祝之陞山東按察
 使出死罪數十人尋擢福建右布政謝病歸居鄉周贍親戚
 無倦色不干郡邑事子祚蕃有傳

陸從論程志叅朱志字耳宣總角補弟子員即究心理學旁
 及諸子百家冀為通儒苦志下帷寒暑不輟萬歷己未進士
 授國子監博士歷工部員外無子其卒也囊橐蕭然稱貸成
 殮初從諭婦翁歿子女俱幼從諭外禦其侮為撫養婚嫁成
 立人以為有謝宏徵之風

徐在中嘉興府吳志字楚石萬歷己未進士歷任工部郎性
 鯁介忤端革職崇禎初復任知廣東廣州府有通番首犯執

平江府志 卷九
法訊治不少貸犯爲朝貴私人銜之借工部任內陵工置之
法朝論寃之子錦孫吳治錦貢生贈靈川知縣吳治康熙甲
子舉人官雲南大理府同知

沈君楨嘉興府袁志字用缶天啟甲子舉人署瑞安縣教諭
捐俸新學宮尋陞江西新泰縣知縣清理積逋常以法繩宗
室不法事觀察吳某欲籍師中丞家產充餉君楨力爭得免
癸未調繁德安革郵傳供應民困以蘇投劾歸卒家無餘貲
孫裔蕃嘉興府吳志字臨鵠天啟乙丑進士授工部主事管
理寶源錢局權蕪湖稅均剔陋弊裕正課會瑞燾張甚關差
例有餽裔蕃不與通幾被譴告歸商民塑像祀之家居耽吟
咏工書法倡修縣學崇禎初薦起兩淮運使不赴

薛振猷嘉興府袁志叅朱志字爾嘉天啟乙丑進士授江西
撫州推官凡七年恩威宣著卻屬縣廩餽革蠹弊辨豁寃獄
數百人政聲赫然分考江西廣東俱得人署府篆所拔士多
雋有紗燈清水之號舉卓異行取銓部以父喪歸遂卒撫民
立祠祀之

陸鏊嘉興府吳志字味道號廉石天啟乙丑進士授刑部主
事恤刑江南補工部尋出守廣東肇慶府清市舶抑豪強墾
副使佐制府破海寇劉香香走死連猺叛鏊攝巡南韶客移
師搗其巢猺惶駭稽顙歸順歷福建叅政晉湖廣按察使激

揚風紀積弊悉除請終養歸後流寇雲擾有建議添設巡撫
夏鎮以鏊為之會病不起著有寶綸堂各種集 按構李詩繫
鏊終福建按

察使與志
傳小異

陸澄原朱志字嗣端號芝房刑部主事錫恩子年十九舉干

鄉性雋爽酬應百端嘯歌不廢天啟乙丑進士授工部主事

莊烈帝即位魏忠賢焰猶熾廷臣皆呼厥臣澄原首斥其名

而劾之 應詔陳言疏臣伏讀詔書一欵有云一應正務詔內
開載未盡者陸續查議條奏其凡可以正士習糾官

邪安民生是國用等項長策仍許諸人直言無隱大哉王言
想見皇上勵精圖治宏開言路遠宗堯舜近邁列祖臣雖小

臣新進世受國恩躬逢聖主龍飛正是擔忱之日謹稟明旨
仍條列四欵惟皇上採擇焉首日正士習國有四民惟士為

首以其明綱常知分誼也必朝廷加意愛惜養其氣節後可
望其功勳比來士氣漸降士節漸卑臺省庶僚不問廷諍惟

日以稱功頌德為事如厥臣魏忠賢服事先帝贊籌邊務拮

据大工亦人臣分內事朝廷論功行賞自有典常即欲優厚

加等官至都督蔭及子孫至矣盡矣何至寵踰開國爵列三

等錦衣遍宗親京堂濫乳臭也先帝聖不自聖每詔旨批荅

必歸功厥臣而厥臣居之不疑外廷奏疏不敢明言忠賢姓

名以盡廢君前臣名之禮至祝釐徧於海內奔走狂於域中

譽之以臯夔尊之以周孔且臯夔周孔當時亦何嘗有此讚

美惟漢代王莽稱功頌德者至四十八萬七千餘人使忠賢

顧名思義必不願與之合轍而無柰身為士大夫者首上建

祠之疏以至市蠹儒梟在在效尤士習漸降卑莫此為甚

即如大工敘功查得永樂十八年北京官殿新成成祖臨御
受賀惟陞營膳郎中蔡信為工部右侍郎其木瓦匠頭金沂
等諸人止授所承而已而今木匠夫頭俱為卿貳儼然乘輿
開棍反欲臺省諸臣引馬避路凌鑠縉紳其士大夫之戀位
畏禍者亦甘心下之是會夫匠之不若矣又如欽差內臣總
理庫藏不過稽查出入之數原與部務無干而乃體統相臨
儼然在堂官之上竟使戶工二部司官羅拜堂下侍立竟日
有識者為之寒心至若外鎮內臣其待方面有司之體更有
甚於此者士未嘗負朝廷朝廷何苦以奴隸待士且重以勅
諭森嚴束之使不得不然也臣所謂正士習者此也糾官邪

者言路之責也近來言官緘默置奸佞於不問如兵部尚書
 崔呈秀貪橫無恥僅臺臣楊維垣畧疏其槩呈秀之惡罄竹
 難盡卽以奪情一事言之其在先帝時猶可藉口曰大工未
 竟也今大工竟矣尚復竊據本兵彈射不顧此其意欲何爲
 耶卽皇上天語煌煌亦曰先帝念殿工未竣屢旨自明是亦
 不以兵柄假呈秀矣且從來九列未有兼官呈秀初以御史
 監工帶左都御史銜猶之可也今已晉司馬矣尚不棄舊銜
 更何意乎臣竊料之不過欲藉三臺之威重壓制言官耳既
 竊兵柄復擅紀綱其克鋒可嚮邇耶且奪情舊制原以墨緣
 視事况熹宗哲皇帝在嬪百官常朝猶仍素服而呈秀公然
 緋袍玉帶坐明轎入衙門安忍無親一至於此推其心又何
 事不可爲夫天下有綱常而後朝廷有法紀三綱絕矣安望
 法紀之立乎臣所謂糾官邪者此也何謂安民生則莫如慎
 刑罰祖宗設三法司專理刑獄凡自徒流而上必覆審詳讞
 而後定罪蓋重之也今立枷之法罪狀未明爰書未定而三
 四日內命已斃矣借名輕刑置人必死豈朝廷立法初意乎
 皇上體如天之仁稟好生之德當必有惻然不寧者臣謂宜
 一切報罷有罪者必下之法司應斬應絞自有定律何至以
 未應死之人立斃之桁楊也又如設五城緝事衙門原爲京
 師地方雜處奸宄易生故以防奸之法正好而因以正好之

法多民乃一經厥衛則捕風追影株連靡竟其嚴刑酷拷有
 目不忍視口不忍言者更甚立枷之慘目今聖主當陽無幽
 不燭謂宜亟照先朝舊制以緝事專責五城臣所謂安民在
 者此也國用至此告匱極矣大工興建以來百方搜括近因
 先帝陵工又新開事例賣官鬻爵議助議捐大損國體括及
 胥役加派窮民更非長策語云省費不若省官今之勳蔭冒
 濫極矣因一殿工蔭及百執事借一邊功賞及中朝今之籍
 金吾而佩銀黃者充街塞路此不甚費乎又如厥臣魏忠賢
 在先帝時士大夫獻諛者倡生祠之說海內效尤在在創立
 計其費不下百萬忠賢旣以身許國何苦以有用之財靡之
 無用之役及今變賣尚可數十萬金臣爲忠賢計宜決出
 此雖會奉明旨云經先帝賜額者照舊遵行然以皇上轉圜
 厥臣救過當不難幡然易慮也臣所謂足國用者此也凡此
 四端皆明詔宣布之欸亦先帝所欲改而未及改之緒留以
 待皇上者皇上毅然立改不惟於天下幸甚亦且於先帝降
 有光此微臣所以忘出位之禁而願以陳之堯舜之前者
 旨薄責于是廷臣窺上意紛紛彈射踵後矣轉員外督盛甲
 廠已巳京師戒嚴檄催火器如織所督廠工僅數十人日造

火藥二千斤兼造兼運身不解帶者五十餘日造火繩用楮
代布失內璫意奉嚴旨然是時以箭簾不稱工部四司俱逮
斃杖者二人澄原僅降級調用尋補順天府照磨遷大理寺
寺副疏叅罪督袁崇煥帝嘉其敢言特遣中使捧函直至邸
舍函面御書發陸澄原四字中批據實回奏不許發抄以小
臣而承委信前此未有也尋遷兵部職方員外提調武闈騎
射不及格主考監試俱下獄澄原閑住罷歸甲戌忌者中以
考功法落職放艇湖山寄懷詩奕者數年而卒澄原厭薄門
戶中立敢言首攻崔魏亦不附東林疏請申勅廷臣各消成
見有市恩修怨舉劾失平者雖東林亦謂之小人不得以楊

左為護身之符有特立獨行恪共厥職者雖不東林不失為
君子不得以崔魏為陷人之穿又曰臣寧寡援孤立為硜硜
之小人決不倚草附木為疑似之君子其自處甚斷也所著

雜集數種行世

橋李詩繫澄原既罷歸奇傑之氣亦遂用於山水文酒間自號隱放主人往往與酒俠談

儅歌童舞妓為飛紅捲白之會間以嬉笑嘲謔俊語紛集或興至集書袞袞數百言搖筆立就性好飲自負酒龍雞鳴燭跋四座偃卧而澄原如未雷宿醒者嘗自言少遊於酒人一向三十餘乃以選人侶於衆人復以言迂要人世目為愚人或曰癡人洎乎拂袖一歸乃復還我不壞之酒人矣故其為詩多秀逸尖新雕香刻翠有佻宕自喜之槩焉黃景昉贈澄原詩經年監厥獨賢勞玉勒珠弓金錯刀如汝火繩猶見謫是誰錦瑟更能操薊門戈甲連遵永麟閣丹青想鄂褒仍送封書留御榻主恩終念漢功曹

陸錫明朱志字幼與號玉井少穎異父基厚每撫而笑曰鵝

兒鳳雛將破殼出豈效而翁與鷄鶩爭乃手授經史引古人忠孝大節以訓迪之天啓乙丑成進士時魏璫用事廷試前門客諷令往謁正色謝之及對策擬一甲第三抑置二甲第三未嘗有愠色授工部主事始祖宣公祠在孤山豪右改爲書院同兄鏊姪澄原合疏上陳得復歸世守出知南直常州府丁艱歸起補徽州徽爲富郡商賈遍天下一路相率餽獻求見顏色不可得璫勢羅織民苦重役思嘯聚爲亂竭心力以安撫之陞江西提學副使清節益著鑒拔得人念母年高乞終養卒于家

郭紹儀朱志叅柘上遺詩字汾仲號丹葵孝子球孫生時有東方歲星之兆甫髫髻卽解仙術嘗雪夜讀書地湧汞盈尺遂悟坎離水火之道天啓乙丑成進士廷對之日有一賣珠兒爲魏璫嬖人示意云君能一見可得狀頭紹儀笑却之日我骨清寒一第已足安望此授當塗令以簡治煩時稱仙吏嘗出見酒肆一人修然古貌徧身絲縷如牛毛紅頰丹砂紹儀知其異與語蓋靖難時人元書秘錄扣之無不應遂傾心事之頗得其學丁卯校南闈多拔名雋擢留都御史時緹騎四出繹騷紹儀上書極論禍幾不測巡視屯田上條議十二則勲戚多佔踞格不行尋掛冠歸一意爲修煉術年八十三卒著有史諾康濟譜三續養生論

平湖縣志 卷九
楊六府張志纂字浩生崇禎時福建布政使陸懷玉以賢良
薦授廣東陵水知縣以勸農重穀爲首務尊崇學校興起人
文黎人吳春盤據大坡要挾居民爲亂設法擒獲立置典刑
民賴以安自奉儉約不異寒素大書于堂曰守伯起家風四
知無愧遊剛峰故里百折不回撫軍薦曰端品真儒後以病
告歸行李蕭然

按六府治陵水多惠政雍正三年盧生甫令臨高爲人名
宦祠朱志鄉飲大賓載其名張志入叢說稱蹟無可稽誤

今更正

屠象美朱志叅橋李詩鑿字幼繩崇正辛未進士授行人對
策稱旨改翰林院檢討東宮講讀疏薦倪元璐李邦華等三
十七人等罷歸築園郡城建百丈廊極泉石之勝乙酉爲亂
兵所害

陸又機朱志字衡如以選貢授山東日照縣知縣地濱海民
貧徵輸不可緩竭力撫字核丁籍使不得增漏有徭役則計
畝均出富豪毋得免積弊一清未幾解組歸父老遮道垂泣
曰公囊空無攜攜此清淚數升去耳手輯龍溪龍湖語錄而
伸以已意著有尚書集解子上瀾有傳

秦宏忠朱志字恕先以貢授紹興府訓導陞湖廣通道縣知
縣縣近苗獠每偵富室新壟發棺攫其首要贖金宏忠嚴禁

之民間言不便者弗聽苗計阻患遂絕山僻士寒每試鄰邑以賂入籍本籍無一入泮者宏忠却其金不受學官始皆本籍人苗稅十年一徵邑令統兵往所至驚擾宏忠攜一僕開誠勸諭苗皆感激十年稽逋旬日畢事在任二年歸行至靖州卒

陸燦朱志叅鈍翁類稿字振玉崇禎甲戌進士授山東濟南府推官廉節自矢丙子分考得士六人趙進美以垂髫冠齊魯監生宋玉鉉兄弟坐盜誣舉家繫獄數載屢叩登聞不得白燦獨察其寃且廉知真盜繫厥獄因請覆鞫悉反其案釋之蒞任三年釋殊死重囚七人城旦以下十餘人戊寅十二

月

大兵破居庸關南下山東大震巡撫顏繼祖率師次德州總監太監高起潛以兵駐臨清濟寧間濟南告急巡按宋學朱適出巡章邱急策騎馳至閱城中兵惟土兵五百及調萊兵七百率司道嬰城固守

大兵築長圍三面困之援兵不至已卯正月二日

舊志作六日誤黎明

城陷學朱死之或勸之去燦瞋目曰城存與存城亡與亡勿顧我遂死之闔門皆遇難

陸清原嘉禾徵獻錄叅朱志字嗣白號岫青陝西提學副使光祚曾孫崇禎甲戌進士授廣東增城知縣鄰邑從化龍門

山菁險惡劇寇嘯聚盤古洞三省合兵撲之不克制府張鏡
 心集屬吏問計清原獨曰寇據山谷兵聚則散兵散則聚不
 若撫之宜可解巡按李雲鴻是其議委攝從化龍門東莞諸
 篆耑任撫字清原先揭示禍福一日單騎抵賊巢賊出不意
 皆震懾請命許以不殺按籍散遣境內獲安壬午召對陳時
 政十事上嘉納之擢雲南道御史浙西白糧北運累民疏請
 官解百糧官運疏臣聞邸報見應天巡撫黃希憲北運當極
 敝之時一疏奉聖旨白糧僉占滋擾包棍胥役歲滋侵
 蠹種種積弊委宜釐正奏內照畝均派專官督解及復近裁
 員缺等議誠裕國便民長策該部速與議覆欽此臣捧讀忭
 舞有以仰窺皇上之周悉民隱恩覃蔭屋也夫北運至今日
 而疲困甚矣如僉點之鑽營而漏富坐貧也如包棍之盤踞
 而誤公蝕私也如抽兌之侵漁而名存實亡也如總協之公
 費而科派多端也如胥舍之虎視而勒索不休也如船戶之

凌訐而逼借無限也如引戶之包納而違制橫加也如漕壓
 之難越而剝費浩繁也百千艱苦誠有繪圖難盡者至逾年
 以來在在起剝節節提淺一解數年浮費不資室家如洗生
 命隨之總捕魏通判因糧無措而仰藥聶同知續委受事而
 掛冠官之慘至此民之痛可知今幸應撫詳計聖聽如流特
 允照畝均派專官督解釐從前之積弊畫百世之長筭載在
 簡編光乎史冊行見蘇松常三郡之遺民欣欣有起色矣但
 嘉湖與三府共糧派大約相同而罷累亦彼此不異今三郡
 特蒙官解而嘉湖尚仍民運是受困不與三郡異而受恩未
 與三郡同當亦聖明所不靳均施者臣備員侍從目擊雨露
 洪敷而能不為桑梓請命乎謹比例上陳乞勅該部將嘉湖
 二府照蘇松常一體議覆官解并移咨撫按確核經久良規
 庶聖明惠養窮黎之德意徧滿東南矣抑臣更有請者十三
 年分嘉湖二府糧解一運三年時日既久起剝復多米之在
 途者偷竊去其半溇爛去其半彼十二年以前已蒙捐免十
 四年未經起解亦蒙改折三分獨十三年分介在兩年之間
 奇荒異苦跋涉到京欲終事而不得仰丐聖明矜憫俯照十
 四年改折之例量與蘇息在皇上正是改本為折不虧國課
 在窮民各得以銀代米生還有日於以再生
 兩郡非淺鮮也事關民生大計謹瀝誠上告
 著為令巡按福

建道經淮安疏言史可法兵單根本重地恐不支今援師雲
集宜悉留淮上聽可法調用不報時獻賊已陷全楚躡及江
右閩與江右連壤所在賊蜂起行部至漳州賊梁良衆萬餘
攻城清原計擒奸宄辛泗等斬之簡驍勇七百人從間道擊
之擒其副李寅賊乃退甲申燕京不守清原捐貲備甲仗募
兵三千勤王請身討賊疏再上奸相馬士英格之乙酉復命
在途聞金陵陷慟曰某不獲從倪范諸臣殉先帝者以奉簡
書在外也今已矣天下事無可爲清原故閩吏當還求死所
耳乃間道入閩從唐王授都御史上疏言閩越唇齒宜亟餉
越卽命清原度嶺犒師時馬士英擁兵竄越閩故以士英棄
君喪國褫其名士英遂激衆劫餉投勅印于江麾其將趙體
元刃及清原五指俱斷幽禁舟中

大兵渡錢塘士英先一日遁兵潰營弁沈起龍毛有備強清原

起清原曰越亡閩必不守去將安之遂赴江死年四十有二

明史綱目三編乾隆四十一年追諡忠節

李天植挽岫青詩
御史真人傑艱危

洵備嘗酬知惟血性嫉惡有剛腸不懼李希
烈寧殊張睢陽英魂告知已千載識遺芳

馬嘉植江南通志參檇李詩繫字培原號木山崇禎甲戌進
士授南直武進知縣縣賦繁重糧長害尤劇嘉植議變爲圖
收任輕而役均宿患頓除漕兌軍丁多耗外邀索嘉植痛抑
之至露刃鼓噪不爲動陞吏科給事中累上封書一時憚之

年卒
等督江西福建餉馬士英嫉其亢直外補廣東道卽謝事歸
葺園于湖湄曰東臯後祝髮村居自號鐵雪道人苦節十數

倪長圩江南通志叅張志字伯屏崇禎丙子鄉試第一丁丑

進士授南直蘇州府推官性剛明嚴毅遇事敢爲其政以抑
豪強鋤奸猾爲務與太守陳洪謐同事陳以慈倪以嚴恩威

互濟士民立雙清書院祀之署嘉定知縣有惠政民爲建報

德祠陸隴其有儀軒歌并序昔年嘉定有署事公倪伯屏者

我邑人也曾有德於民因建報德祠其內有假山爲
予前任趙尹雍容移置署中有儀軒軒雖美觀而祠幾廢予
故有感而作吁嗟有儀軒其石何離奇問石何自來來自改
侯祠問昔祠初成吏民競祝釐或持觴酒勸或獻萬年辭翼
翼堂與室尊嚴若神祇孰知祠中石一朝遷在斯廢興誠可

歎此型豈渺微我聞召公棠周人永勿移剪拜各相戒于載
以爲期勳之何如耳今古豈異時感應捷桴鼓聖賢寧我欺
恭寬信敏惠斯須不可離轉兵部主事甲申後歸與屠檢訖
反躬而已矣何歎亦何疑

象美稱莫逆象美死長圩遂入山久之乃歸稱李詩繫長圩
生平博學好古

善書法精於制義臨文伸紙往往終日危坐不成一字然一
藝旣就其瑰奇瑋麗幽峭奧崛之致直足驚人駭俗上擬周
秦非漢唐以下所及也自有明三百年來讀書種
子無此異才嗚呼如伯屏者其無負平時文者歟

金和朱志字燮之崇禎庚辰進士父德普福建通判和初授

南直溧陽縣知縣漕兌有遼米練米襄米諸名和倡爲合兌

法民便之調繁山陽邑多水患舊例修河費解京口遇河決

估價詳支曠日持久和請添設山清廳同知專司其事隨決

隨報給發修築總河疏請允行等歸里無子自營邱壠築舍

植花果於傍

沈中柱朱志叅張志字石臣號摩青口吃不能言熟于左國史漢尤好管韓為文縱橫闔闕落筆數千言立就崇禎庚辰進士授江西吉水縣知縣時大江左右歲稔中柱請減租蠲稅當事者格不行復鄒忠介書院以課士黃石齋以言事下獄遺書劉彭岫力救罷歸後構懷木菴奉父隱其中著有懷本菴稿問道錄

明詩綜中柱晚為僧名行燃號無諍往來靈隱金粟間

徐有度明史綱目三編平湖人博羅知縣城陷罵賊遇害乾隆四十一年追諡節愍

按有度舊志皆不立傳選舉門亦無其名及讀明史綱目三編載為平湖人考一統志直省無與平湖同邑名者其為邑人似無可疑因列諸勝國名臣之後

國朝

陸濬睿朱志字以愚號未庵明兵部侍郎長庚孫順治丙戌舉人授直隸宣府推官宣府古上谷地軍民雜處素稱難治前官皆用法繩之濬睿獨御以寬重辟鞏加世段大康性全等累訊不減察其冤出之所拔士姚永煦胡顯祖等一時售去塞外士習為之振起悍弁徐洪志擅斃平民按之如律上獻忤撫軍意投劾歸郊居閒放陶情詩酒十數年而卒生平所著彙成十刻行世後以子棗累贈內閣學士兼禮部侍郎

濬睿七歲喪母事繼母盡孝課諸子如嚴師姊適李而寡子天迎養于家終其身于世楷菜有傳

施洪烈朱志字仲芳號寄廬弱冠受知學道洪承疇才名藉甚順治乙酉

恩貢授廣東欽州知州欽地未闢教徒龍灘以自給署程鄉篆悉捐里長營辦費修復七賢書院既抵欽

招輯流亡錄軍中所掠子女姓氏榜通衢俾眷屬領歸壤接交趾山海寇交訐加意綏輯民賴以安尋陞江南松江府同

知知府李正華性剛嚴僚屬鮮當意一見推為長者提督馬進寶斐而鷲呵喝文吏長跪如屬員定制行移不相統洪烈

遂以客禮見抗不稍絀進寶心銜之設宴困以巨觥詰朝偵狀則洪烈已據案聽訟進寶氣折然卒為所中罷歸年七十

一卒洪烈當謁選時貸重債贖故友之妻江氏及其子楊福還里自鬻產數十畝以償慷慨急人難其天性也所著有粵

遊觀海雄遊天中諸集橋李詩繫寄廬初授欽州牧時粵疆未定乃依幕府流寓五羊城衣敝不

完并食而食幸以詩見重李撫軍稍稍得衣食一日藩邸張讌羣吏紛集而王所召客惟一施欽州曰今日非宴下吏重

詩人也罷歸後著有詩史集晚年西平知縣沈棻延至署中命其子季友受業焉趙韓答仲芳詩習慣風波不入愁衝寒

尚有負薪裘空餘飛夢蒹葭水只合浮家杜若洲陶令書題惟甲子少陵詩史當春秋知君一斗篇盈百何日同傾舊酒樓

陸世楷浙江通志參曝書亭集字英一號孝山晚號錮翁明

兵部侍郎長庚孫順治丙戌拔貢授山西平陽府通判甫至

陸世楷浙江通志參曝書亭集字英一號孝山晚號錮翁明

兵部侍郎長庚孫順治丙戌拔貢授山西平陽府通判甫至

陸世楷浙江通志參曝書亭集字英一號孝山晚號錮翁明

兵部侍郎長庚孫順治丙戌拔貢授山西平陽府通判甫至

陸世楷浙江通志參曝書亭集字英一號孝山晚號錮翁明

兵部侍郎長庚孫順治丙戌拔貢授山西平陽府通判甫至

平陽縣志 卷九
姜瓖構亂遠近螽起平陽被圍世楷登陴固守百日而城卒
全旋誘降其魁李建泰釋其黨師已而大飢人相食爲粥賜
給全活甚衆遷山東登州府同知海寇張名振揚帆猝至將
逼城下立設守具率舟師禦之寇乃逸去時叛帥海時行剽
剝州縣獨戒勿犯境登有嫠婦夜爲盜所殺隣里訐其媳有
所私慮事露殺姑滅口世楷時攝縣事察其寃禱于城隍神
卒得殺人者丙午陞廣東南雄知府時百粵初平平南靖南
兩藩王並駐廣州羽榭不絕于道部將更替出嶺一日筮死
七人世楷馳見帥論軍士罪有戴孔雀翎者二人入始興山
自稱平藩侍衛發民鑿礦民盡恐世楷往詰曰王雖尊不得

擅役吾民今不使太守知詐也遂縛二人送廣州王不敢問
黠僧指南暱于藩倚勢爲虐世楷計縛之斃諸杖民以爲快
嶺南俗好訟世楷曲喻以理赴愬者漸息暇築天峰書院課
諸生温鏐王澐等月給其廩先後售去甲寅丁外艱去郡老
稚遮道不得行立祠府治東士民春秋社祭服闋補思州值
王師凱旋軍馬縣繹府舊設平溪清浪二衛後劃歸湖廣而站
夫猶循例派協世楷請于上官得免繼遭旱禱斗米二千錢
吏請開徵秋稅世楷不可民德之輸者過半未幾以病引歸
生平遇人和易恂恂似不能言義所不可雖權要莫奪歸而
貧窶不殊寒素讀書之外足不入公府著有越吟秋吟晉吟

齊吟各一卷嶺外思陽集種玉亭詞踞勝臺詞南雄思州府

志子奎勲有傳稱李詩鑿孝山詩格直追開寶合雅歸風不獨為湖中領袖也

馬紹曾朱志字覲揚明太常少卿德豐孫順治己丑進士選

庶吉士授翰林院編修甲午主考江南徐元文汪琬秦松齡

莫大勲等皆出其門轉山西岢嵐道副使舉卓異陞福建督

糧道叅政時閩省方用兵徵調如織尅期給發兼攝水利驛

傳鹽法諸篆有肆應才總督李率泰深以為能擢河南按察

司內陞右通政使歷工部左右侍郎一月三遷異數也尋左

遷通政司叅議轉兵部督捕堂理事官陞都察院右副都御

史晉刑部左右侍郎戶部右侍郎奉

命清筭畿輔賑荒錢糧勞瘁乞歸年餘暴卒

鄭龍光浙江通志叅朱志字兩為順治己丑進士授廣東南

雄府知府進士無初任郡守者時從三藩征粵蓋特典也雄

為兩廣門戶地初闢百姓離散軍旅來往無虛日龍光剔姦

除蠹扶弱存孤民倚賴之嘗履畝省荒過五羊嶺前有虎負

嶠眾莫敢進龍光曰昔劉昆為治虎北渡河今太守以勸農

入山虎曷為來哉叱馭驅之虎遁去以一童二僕自隨客投

謁無所拒至其署見其清素無敢以私請者郡有太平橋稅

故事府廳分季監收府實操其歲會龍光讓之三廳而已不

與藩弁客兵為地方害力請兩藩懲治賴建和劉志德等奸

猾屏息平田司黃石寨草賊盤踞出肆劫掠詳會虔兵合勦除之自兩藩入粵郡佐以下官多納賄署任民不勝其腹削龍光劾逐王奠基伍其清等十數員雄人快之順治丙申舉

卓異

賜蟒袍

一襲陞西寧副使清操惠政一如治雄時尋謝政歸

于琳贈兩為歸

里詩建牙開府黑山東此日聲名在五戎苜蓿花濃宛馬健葡萄酒熟戍樓空風高吐魯驚傳箭雪滿蓬婆競挽弓生入玉門班定遠何人重報月氏功

倪籥元朱志字府一順治己丑進士授湖廣蘄水縣知縣捐俸代償積逋性恬靜不善事上官尋罷歸從兄聖生以歲貢歷杭州府教授有金汝勵繆沅二人受李自成偽職三學諸

生公憤欲遂之當事命察諸生姓名聖生不報掛冠歸

陸光旭畿輔通志叅朱志字鶴田號屈亭順治壬辰進士授

順天保定縣知縣癸巳大水決隄衝突為患光旭築堤捍水

民呼陸公堤已而大疫繼作賜藥療治全活甚眾歲饑捐俸

作糜以賑署中食或不給擢陝西道御史奏請免霸文保三

州縣荒地錢糧

請蠲糧疏臣惟則壤定賦計畝均輸在國家歲取之徵亦屬小民樂輸之稅未有桑田已

變滄海而徵徭猶隸版圖如霸州城南之地保定縣河北之田文安縣東窪等處者也據三處之地勢處堤外在前朝止有琉璃河水道故十年五潦以五年之收賠五年之潦民止勞其力而未嘗盡其才尚可支持自順治十年間渾河南注從霸州城根達口頭村而赴東洵渾波所過蕩為巨津而三處之地皆成水府淵深不測一望汪洋數十里千頃之良田久已問諸水濱矣臣初任保定縣時嘗從保至霸艤舟而過見浩漭無涯扶蒲連渚漁人網集鷓鴣成羣三州縣困苦窮

民每環聚而泣訴曰此卽在昔桑麻衣食之缺畝也此卽於今歲徵季納之錢糧也此卽十年來賣妻鬻子賠累無窮之谿壑也臣目擊其狀不禁悽然欲絕夫以十餘年不見尺土之處而賠十餘年分毫不可少之糧以三州縣灾荒皮骨之民而出百千兩無地無收之稅其不轉徙流亡顧可得乎嗟嗟縱有籽粒將布種之無從縱欲力耕將開懇之何日望洋而嘆徒切呼天搶地之情伏念

皇上軫恤災黎無所不至卽一年水旱尚且帑金發賑蠲詔屢頒首重

畿輔之民以爲根本至計今三州縣以十餘年湮沒之地令其仍列計籍一例輸將臣知

睿慈必有大不忍于此也臣非不知司農仰屋之際何敢遽爲請蠲但有民方有地有地方有賦以臣身親其苦而不爲呼籲請命非所以仰承

德意矣如果芻言不謬伏乞

皇上勅部確查地畝多寡暫爲蠲除俟有地可懇之日再行起科則畿民之困稍蘇而自近及遠無不戴

皇仁之浩蕩矣

時議罷巡方光旭復上

疏言 議巡方疏竊惟人臣之義公爾忘私國爾忘家事君之道知無不言言無不盡若一事也明知其不可而不言

此爲徇私明知其不可而不能言且因人之可以爲可此爲畏勢徇私則不得不害公畏勢則不得不背國二者皆臣工中之罪人非

盛世所宜有也臣閱邸報切見近者兩次所議停止巡方一事奉

旨巡方應停應留必衆議僉同乃可永爲定制二議各持所見何者實爲有益未見詳確事關重大滿漢不得膠執成見務求歸於至當着公同再加詳議畫一具奏欽此仰見我

皇上明見萬里所以慎重巡方者至詳至悉且務使滿漢諸臣公議允協以爲不易之模也臣意會議諸臣必當仰體

上裁虛公商榷或停或留務求有利

國家至當不移而後已乃長安關傳本月二十六日會議之時主前議者卽得升堂入室安坐從容主後議者惟聽待於二門之外及至發出畫題而議稿已成盈庭囁嚅不敢爲異即有二三大臣因公持議亦置之不論不議之間惟出而吁嗟嘆息而已是

皇上曰衆議而諸臣出於獨斷矣

皇上曰僉同而諸臣出於一偏矣

皇上曰不得膠執成見而諸臣之膠執愈甚成見更堅矣巡方一官何足惜但念

皇上凡一應重大事情無不憑諸臣之會議倘事事如此擅專者罔顧

國是而快偏私唯諾者甘徇情面而負君父則天下事尚可言哉臣計今大小諸臣內之所不便者惟

言官外之所不便者惟巡方有言官而大奸大惡得以上聞有巡方而汚吏貪官不時參處其為今日眼中之釘者固非一朝一夕矣而諸臣必欲去之當必有故臣亦何敢深論但今

時猶多故九重宵旰彌殷在外所藉以戮力封疆撫綏弭戢者惟撫按是賴督臣總其要而已今一去之後其為督撫無人互糾貪墨無人參劾

欽件無人審理以及贓贖之損國課民隱之難上通利弊之無興革豪蠹之肆晝行皆可不論

祇今伏莽未靖饑荒載道兵旅繁興軍需孔亟撫臣專駐省中誰為佐其不逮而分猷合筭親咨利病而密陳機宜是實關天下之安危杞人之慮有不得不念及此也况朝廷之設官非一而獨是巡方一職既設而屢停亦屢停而屢復復停者無不由於下議復者無不出於

上裁是皇上早已洞見巡方之不可停而旋復也亦洞見巡方之必應復而

聖鑒亦不忍輕停也而諸臣之議停者或偏或公知早已洞燭矣如以人有不肖也則當去其人何以去其官如

以法有未善也則當更其法何以廢其事如曰賂賄可行也則多金如盧填言亦未嘗漏網矣如曰情面可通也則位尊如耿焯亦未嘗隱容矣若以其人未必皆賢而去之則督撫亦有不肖方面不乏貪污有司時多敗類將盡天下之官而停之乎此真因噎廢食之筭也臣以臺臣而言巡方迹涉嫌疑然因避嫌疑之跡而不顧

國是之有關遂隱忍不敢言身謀雖善而負國之罪更大矣伏願

皇上凡軍國重情用人出政關係民社例應會議者悉召滿漢諸臣于御前令其各抒所見互相質正可否一聽于

宸斷庶幾天威在上私議難徇確見良策可以自展則真是真非自有一定之

權衡其所關于國計之大非淺鮮矣奏入

章皇帝優容之尋遷分守冀南道釋罪平刑獄無冤繫聞保定復罹

決隄之厄遣使賚金分給窮民保人立祠祀之考滿第一等

乙巳告終養歸服闋補江安糧儲道生平讀書好奇博兼涉佛老後因爲所累未竟其用遂卒著有屈亭遺稿

沈葵朱志叅樵李詩繫字子佩號藕菴順治乙未進士授河南西平縣知縣初下車灌莽蔽天巷無居民倉廩多積遭荼設法招流亡給牛種諭以歲豐取償免其息民襁負至墾荒地數百頃又許以布粟代稅卽束麻擔草亦瑣細不憚煩歲募河夫多逋逃患乃按貧戶充役民喜得食且以工價完逋稅率爭先赴工工易竣邑衝徭役不時豪強隱蔽多徧累茶按戶均點一年止役一日歲有餘夫甲辰飛蝗徧野獨不入西平境治聲爲中州第一邑有山曰嶺呀因號嶺呀外史時

開府婪惡荼強項不爲屈羈俸十餘年卒于官年四十七西平士民建祠北郊祀之著有栢亭稿藕菴尺牘詩體明辨文體明辨西平縣志子季友有傳

陸洽原嘉興府吳志字嗣開號話山順治辛卯副榜甲午拔貢授四川汶川縣知縣汶羌番錯處時遭張獻忠殘殺後邑境蕭然洽原招流亡勸開墾省徭役息訟獄學官縣署關堡索橋諸役以次畢舉內艱歸遂不赴補族有景賢祠洽原主之祠規獲整邑重建明倫堂首定議均輸年八十卒著有詒山集

陸楙畿輔通志叅樵李詩繫字林士號匏湖順治甲午副榜

選授直隸盧龍縣知縣盧龍屬兩京孔道輪蹄蠶午且多宗室貴戚莊旗人例不得用笞杖乃削木挺挺之兵弁有強買者輒捕而置之獄于是咸震懾勿敢動官署蕭然如禪寮旅舍有僧以佛事請之府府笑應曰而欲我屬之典朝衣縣令耶卒以強項忤上官被劾即步行出署及束裝惟來時敝篋傘屐而已楸於經史無弗窺獨好楊子雲書其詩文剗削町畦穿穴險固造於峻潔而止及卒有詩訣親友曰而今一枕繩牀好方是人間歸去人著有鵲亭集行世受中繩牀學問古與嘗作盤面人詩奇字難讀性極謹終身無疾遽之色雖日遊處者未嘗變生平不忿早幼之喪其堂從頗繁出而吉服者蓋鮮焉陸瑤林嘉興府吳志字以攻順治戊戌進士授江西金谿縣

知縣性慈惠尚德化時陳丞因漕務逋公帑繫獄代償得脫又為貧民償積逋澤被最厚迨親老辭歸以圖書翰墨為緣著有聽松軒詩集九畹閣詩餘三卷

邵延齡嘉興府吳志字大年號靜山順治辛丑進士除內閣中書逆藩吳三桂反西南用兵同官某當隨征延齡以其母老毅然請代叅畫軍事多奇中為靖逆侯張勇陳平蜀方畧勇悉資之從軍還遷刑部郎中多平反督學江西歸里卒著有耐軒全稿

倪思恂高志字宏方由選貢任金溪丞少負膂力康熙十三年耿逆遣偽將圍金溪思恂躬率民兵多方捍禦逆將薄城

思恂復仗劍先驅督戰死之祀名宦

按思恂官七品以下其忠節不可泯特附列傳

楊燦嘉興府吳志字葵齋康熙甲辰進士授直隸清豐縣知

縣時征蜀兵駐郊外燦營芻蕘絕不累民有孕婦驟死未得

毆者名燦齋宿城隍廟夢兩月在天一婦抱嬰孩哭訪拘李

閏月者一訊即伏罪時頌神明嘗修邑志勤季試入為御史

疏陳祀事之重糾陪祀九卿又請廣正途遴選風裁矯矯酌

鄉會試額疏竊惟帝世闢門以來三代之額俊求賢原無一

皇上

續承令緒兼以聲教四訖網羅英俊亦既不一其途矣然士子

學古入官家修廷獻凡經國治民之畧大約自辟雍庠序廣

世祖

章皇帝時鄉試中式直隸一百六十餘名廣至二百餘名其外

大省中省小省一百二十名至八九十名不等會試中式

百裁

半我登大寶仍照減額舉行未之有改而吳逆變亂以後捐納例

開更勢若積薪自宜從減近者車書一統海宇式廓亘古未

有雖現在銓司尚不乏人而按期選用豈無隨時淘汰之虞

皇上

詳慎官方又不輕授一員則轉盼晨星所宜預計又近奉

俞旨各直省恩拔送監者每州縣學一名府學二名計不下千有餘

聖意

而功令方新學臣俱不敢不拔取真才以仰承

士子亦聞風興起莫不欲奮志聯鑣漸登仕籍但查國子監

皇上

特啟聖心勅查舊例量增直隸中額其餘亦照省分之大小不

拘多寡稍行酌復而會試亦為推

恩量擴則於國家之所加費用者有限而得人以備師濟之選者無窮也至

於童生入學各直省已經歲試一週今科考方行彼寒窗之
呻吟待試者望

恩更切儼蒙

皇上推念前此之進額甚廣今既停捐納亦量增數名以宏
皇上一體崇文重儒之至意
則德教更無涯矣
尋以母老陳情歸宦橐蕭然

陸棻浙江通志參毛西河文集原名世枋字義山號雅坪明
兵部侍郎長庚孫年十六入都育于順城伯固山馬某家馬
器重之既長歸補邑庠生入國學以高等授內宏文院中書
登康熙丁未進士尋管內秘書院典籍戊午舉博學鴻詞科
改翰林院編脩充明史纂修官撰成祖本紀及漕河水利諸
志旋陞贊善歷典福建鄉試順天武鄉試得人最盛

上嘗召棻至乾清宮閣內賜坐出五臺金蓮花命賦限韻援筆立就

上嘆賞不置甲戌試翰詹諸官八十九人于豐澤園

上親擢棻第一諭曰連次詩文並無出汝右者而從前薦引並未之
及始知上聞故多壅也一日七奉

旨歷庶子講讀等官陞內閣學士兼禮部侍郎充續修唐類函總裁
三朝國史平定方畧會典一統志副總裁嘗在內閣一日批紅本七

十有奇長至奏勾決本請出矜疑二十餘人後一年告歸生
平舉止有常度和易簡坦居顯貴歆然不自足與人交不媿
矧而親人皆信之益都馮相國銓嘗曰吾于近人多疑事而
獨不疑于義山其為時欽服如此幼聘楊氏及在旗順誠伯
將為問名侯氏總兵黃某亦欲以女妻之時歸期未卜棻以

不負楊氏力辭順誠伯高其義性孝友伯兄世楷先歿菜竭志承歡無倦遇地方利弊籌畫周詳族黨有寄金者死遠徼其子歸封識如故還之卒年七十著有雅坪文稿十卷詩稿

四十卷詞譜三卷應試進呈詩文合刻一卷雜著若干卷

江都

汪懋麟送義山假歸當湖詩與君握別當春風可惜東華試燈夜對酒惆悵秋碧堂落日無多在簾下山川圖畫正滿眼中
有扁舟去如瀉清波灩灩疑當湖烟樹搖空布帆亞君行儼入圖書中活水輕風不須借寄語承明一輩賢但說榮名舉手謝坐擁小妾看添丁瀟酒琴書倚田舍山中意趣人少知此味依稀如食蔗拋却官書真自閒任取狂吟豈堪怕送君令我生愧心杜宇春深向人罵高士奇與義山話別詩九衢燈火暗驛路柳條新去就渾難事聲華豈戀人畫船籠翡翠繡襖護麒麟好作松筠計春醪勸獨頻吾亦思鄉久言歸恨每遲灌園堪自適對宇早相期竹裏關泉脈花鬪理釣絲為尋五畝宅
鷓鴣莫教疑

高士奇浙江通志叅高志字澹人號江村先世餘姚人初補

杭州府學生員係籍錢塘康熙辛亥入國學考取留翰林院辦事乙卯設詹事府士奇授錄事尋陞內閣中書入直

內廷朝夕侍從

恩寵日隆錫賚優渥己未陞翰林院侍講京師夜禁嚴嘗下直漏深特勅禁旅騎校送至寓所日以爲常歷詹事府少詹己巳歸里始家

平湖甲戌起補原職充明史館纂脩官丙子厄魯特噶爾丹叛

上親征者三士奇輒從瀚海交河周旋盡瘁磨盾草檄皆倚馬立就丁丑厄魯特平以母老乞還

上召見暢春園親賜金卮酒諭曰爾非軍功戰陣而以文字事主始
終梗直謹慎朕甚嘉賴之既歸

恩禮有加卽家陞禮部侍郎兼翰林院學士加正一品士奇出入

禁闈二十年小心謹密未嘗言及溫室樹嘗充春秋講義總裁

大清一統志政治典訓副總裁策府圖書編摩最富善鍾王小

楷工詩尤長應制體論者與桐城張相國英並稱精賞鑒凡

法書名繪藝鼎琬琰經拂拭者聲價十倍生平事母至孝居

鄉謙和約束家人甚嚴配傅夫人歿終身不畜姬妾癸未春

上南巡士奇隨

駕入都是年六月歸里卒年五十九

賜祭葬諡文恪著有春秋地名考畧十四卷左傳紀事本末五十三

卷松亭行紀二卷扈從西巡日錄一卷金鰲退食筆記二卷

江村銷夏錄三卷編珠補遺二卷續編珠二卷三體唐詩補

注六卷人四庫全書左傳姓名同異考四卷左國類八卷注左傳

類對賦一卷天祿識餘十二卷扈從東巡日錄二卷塞北小

鈔登岱恭紀扈從西山詩北墅抱瓮錄各一卷柘西閒居錄

八卷讀書筆記十二卷隨輦正續集十一卷城北集八卷苑

西集十二卷歸田集十四卷獨旦集六卷四明山題詠一卷

簡靜齋集唐悼亡詩二卷獨旦詞一卷田間恭紀一卷清吟

堂正續集二十一卷竹牕集二十卷經進文藁六卷蔬香詞

竹廳詞各一卷唐詩揆藻八卷唐詩小補一卷子輿軒輿有傳軒候補京府通判番馬梁佩蘭贈江村詩歲蕤紫鸞鳳天

逢休明代應運揚輝光一鳴占秦階再鳴叶歸昌懷仁與蹈義步趾誠不常食惟青琅玕飲以金盃漿想見遊蓬萊崑崙象高岡直上九千仞絳闕朝玉皇般裔盤卿雲天際驂龍翔華亭王頊齡寄懷詩訪戴移山棹攀嵒望柳汀何時重話兩相對一燈青桐城張英贈詩聞說園林一水通扁舟來往趁樵風著書千卷琳琅字高詠晴嵐罨畫中

陸祚蕃嘉興府吳志纂字武園明福建布政使懷玉子康熙

癸丑進士選翰林院庶吉士改授雲南道御史時議蘇州設

駐防滿兵祚蕃上疏言請酌駐防緩急疏從來用兵莫先於辨形勢故地當險要必須屯設重兵以為思患預防之計而無事之地不與焉蓋無事之地多設一兵則要地之兵力反為之分而又為之移節往來使士卒有奔命之苦地方有供應之繁則不特兵分而餉亦絀方今征討四出司計者仰屋而籌總計天下正賦雜項錢糧尚虞

宸聽至

皇上勅

不給倘能省一無益之兵即省一必需之餉省一處無益之餉即可養一處有益之兵此所謂拔本塞源較之紛紛議生議節者相去固甚遠也目下見在用兵之地勤撫兼施請兵增餉不一而足臣書生未諳機宜不敢輕議以賣

如江南蘇州一郡地非巖疆好無竊發以言乎濱海之區則崇明有提督矣松江有提督矣以言乎上游之勢則京口有將軍矣江寧有重兵矣何事多此一旅空糜芻茭也撫臣當聞逆初變徵郡未定之時人心風鶴請師暫鎮以防肘腋之虞今浙東漸次底定閩逆不難蕩平而內地州縣依然養兵不用徒令逍遙河上不戰不耕此何為者也雖向來駐防之兵近日已經調發又旋移京口之兵以資之移上游有用之兵置之無用之地督撫身在地方止從一隅起見但天下大勢當權緩急若如此內地而悉煩兵以守之其糜費為何如哉若謂弭盜安民必須綢繆捍禦則自撫臣管兵以來地方有經制之兵標下有額設之卒其間材官技士自極一時之選獨不可藉為守禦之資顧必動煩禁旅耶臣請

皇上勅令該督撫不必以從前題請為嫌確議應否可撤如需兵進取或楚或閩即宜就便調發則一轉移間而兵有實用餉不虛糜未必非籌時節用之一端也奏入

詔報可尋又上歲終核實疏時論鹽之

歲終核實疏竊自軍興以來供億繁鉅歲費不貲凡內外

朝

大小臣工無不志切同仇俱期減此朝食雖捐糜頂踵以報朝廷尚所不辭至區區稍增租賦仰佐持籌尤分誼所當急効者也康熙十五年間戶部覆准科臣張惟赤軍需方虞匱乏等事一疏令官員鄉紳於錢糧正額之外加徵十分之三所徵無多而軍需有助行之年餘固已輸將恐後但仕籍既有變更田土不無買賣况州縣未必皆賢如或偏庇因循勢必漸滋流弊臣於此不能無議焉如考諸仕籍凡一歲之內身故者有之革職者有之辨復還職者有之夫其人既經革職身故則不在仕官之列矣是戶下之田亦宜開除其人既經辨復還職則不在齊民之列矣是戶下之田亦宜增課此仕籍之變更所當急為核定者也再稽諸田賦一歲之內官田之售於平民即宜改為民田而不當仍混於加徵之數民田既售於平民即宜改為官田而不當仍混於民賦之中此田土之買賣所當急為清釐者也如以開除太多恐現在官田之額將來或致虧損殊不知革職已故之官與還職之官其人數原足相當則田數豈有增減况由衿民而登仕籍者歲益而口增原無缺額之患也至于人之貧富各有其時則田之買

皇上勅

賣宜從其便故官田可變為民產民產亦可變為官田截長補短自無盈虧此後所銷之數少而所補之數多皆未可知特慮為有司者或拘初報之定額而憚於更正或任吏胥之操縱而失於稽查將使貧宦欲棄之田產人畏官戶之名遂巡顧慮而不敢買富紳新置之膏腴暗藏民戶之下規避隱漏而無可稽雖逆孽指日蕩平停止之期不遠但事關課賦不可使一日有偏枯不均之弊此臣所由鯁鯁過計也伏請下該部及今通行各省令督撫嚴飭有司確加查核應開除者即為開除應增補者即為增補於歲終彙報照額徵收一秉至公無徇情面如有任意偏私或聽吏胥需索增除不實及因循怠玩者督撫立時指叅悉照定例處分則歲入之課餉既有裨於軍需而戶甲之徵輸可立清其弊竇於計非小

國

補也 遷登萊叅議察冤獄翦豪強止開礦視學廣西文風

不振補貴州糧驛叅政值安順兵變單騎定之著有淳意齋

詩草二卷粵西偶記一卷子鼎揆戶部員外

談允誠嘉興府吳志字孚上康熙癸丑進士授內閣中書歷

江南鎮江府知府鎮為南北孔道兵民雜處允誠一秉至公
姦豪屏跡嚴絕苞苴有羊續懸魚風子紹芳辛卯舉人

陸煥元嘉興府吳志字閻仲康熙丁巳舉人性溫恭謙抑好
讀書編蒲緝柳晝夜不倦授廣東昌化縣知縣甫到官卒

陸瑋林高志字右韋少為諸生時知縣朱維熊延修邑志分
纂食貨傳詳核有體以例貢入成均選授直隸安肅縣知縣

有惠政在任三年士民感戴歸里後與二三知己倡和南村
文采風流溢于賓座著有拈嘯軒偶存北征松下歸田諸詩

稿

曹志周嘉興府吳志字微之康熙己未進士家居孝友操制

義選政四方從遊日衆授四川南江縣知縣課農桑勤開墾
設義學公餘作南江近藝與諸生切劘有絃誦風庚午分校
得士五人禮闈皆聯捷陞工部主事生平著作皆能嘉惠後
學

陸炯嘉興府吳志字石年幼孤事祖母寡母承顏順志叔貧
有幼子寄養他氏攜歸撫之得成立年六十登康熙己未進
士需次在都魏敏果象樞延為子師選山西太谷縣知縣釐
姦弊興教化農時親詣田間提壺挈榼以相慰勞士民愛之
陞御史奉

命巡城有內監騎馬入公署指稱銜貴戚諭炯械之奏聞

上下法司置重典戒諸藩府曰若曹有家人宜戒飭之御史法不爾
貸也年七十五卒于官

邵鳳起張志字蒼馭康熙辛酉舉人授安徽歙縣知縣俗好
輕生遇命案力爲剖雪有汪某與表弟某貿易同歸謀其財
刃之事發提訊欲罪汪未得埋尸處翼日以公事過南山下
見鴉數萬飛鳴團集不去隨于其處掘得尸汪吐實伏法後
他州縣有疑獄大吏輒委訊沉寃悉白再補廣東增城兼攝
順德篆治行循卓一如在歙時及告歸士民愛戴多相率詣
督撫乞留者

沈之鈺嘉興府吳志叅張志父岷字撫辰康熙乙卯舉人有
文名任鎮海教諭捐俸修學教若蘇湖之鈺甲子舉人亦工
文授雲南羅次知縣便宜出倉粟賑飢全活無筭攝隣縣悉
稱文吏庚子分校鄉闈薦拔皆知名士以勞瘁卒于官

沈峴嘉興府吳志字玉山號禾畔康熙乙丑進士授山西徐
溝縣知縣民有甫成婚夫出十年不歸翁姑疑子死欲嫁其
婦投牒於縣婦至大慟願終守而翁姑已受聘者財禮無所
償峴給俸償之越三日夫歸遠近稱頌舉卓異內陞部曹歷
戶部江西司員外典黔試稱得士罷歸後築室墓傍炊烟不
繼嘯歌自得著有味菜山房集禾畔詩餘沈不負寄懷禾畔
詩三板農船語思
君每誦之秋來風雨橫老境弟兄知心事能
閒否籬花正及時南飛無數燕何日把新詩

馬煥曾高志字學海例貢生由教習選湖北布政司經歷戊辰楚督標裁兵夏包子據城倡亂逼死重臣煥曾乘賊兵開門行汲微服而出晝夜徒跣抵上蔡飛羽轉報復奔河南巡撫丁某轅門痛哭乞師乃得尅期會勦逆亂以平敘功陞雲南南安州知州六年乞休年七十八卒

沈淠日嘉興府吳志纂字融谷號柘西以貢授廣西來賓縣知縣調大河陞辰州府同知歷有治績卒于官少善填詞以才勝為浙西六家詞之一兼工詩所著有楚遊草燕遊草柘

西精舍詞沈岸登懷柘西詩年來屈指情魂地大約都非舊水村最是閩江樓下別暮潮吹淚落沙痕

姚宏度嘉興府吳志字宗裴以貢生授中書為詩文超俊不凡工書畫扶危濟困力行善事著有書畫叅一山房吟稿

馮千英高志字序皇康熙丁丑進士授廣西荔浦縣知縣荔浦民獠錯處洞獠每出剽掠千英深入重險宣諭德化獠感動悉歸所掠子女後復請立堡捐山田一項募士著耕守民好私和復讐自千英為政俗乃革士罕知學設義塾延師訓之丁憂服闋補河南太康縣值軍需盡瘁勿遑中牟武陟河溢民當往助修築千英即工所催築之民以為便葺先賢陳子禽高子羔祠貯五經子史性理等書于其中令諸生以時肄業親為講解丙申河南蝗災獨不入太康境年六十四卒于官

高輿嘉興府吳志叅張志原名元受字與亭號青壁禮部侍郎文恪士奇長子康熙庚辰進士選翰林院庶吉士卽乞假歸侍養祖母俞太夫人癸未士奇卒

上卽命輿校皇輿表事竣乙酉

南巡特授輿編修

命卽家開局校刊佩文齋咏物詩選淵鑑類函二書書成赴補原官賜第暢春園北自是入則侍直出則扈從從容簪筆朝夕恪勤尋奉旨纂駢字類編未竣而卒

上聞傷悼存問其家召其從子衡至京以喪歸事詳衡傳輿慎重謙和不立崖岸生長富貴視黃金如塵土好施與戚友待以舉

火者甚衆比卒故舊多有爲位哭者性耽吟咏年十三卽工詩大學士陳廷敬張英器之

上嘗書谷蘭齋賜輿輿因以名其集凡詩六卷子嵩有傳孫澍字說

霖邑庠生後官鹽大使署陝西靖邊縣知縣修棧道建養老

書院卒于官

張雲錦育嬰堂志康熙四十五年創建育嬰堂輿與里人朱弓錫周維翰沈瑜過熬主其事棄

嬰始活

胡紹安紹高高志參張志紹安字國期號筆廬康熙庚辰進士授順天武清知縣邑當孔道以仁廉治之變產償供應免紅剝船變價諸累雪冤獄修學宮公餘常手一編吟誦若諸生以體羸不任煩劇逾年卒于官紹高字聞衣紹安弟工制

藝操選政三十年康熙己丑進士授貴州貴筑縣知縣革除苛派丁艱歸又遭母喪廬墓日涕泣尋卒初紹安沒紹高傾貲產助完官帑撫姪讀書成立里人賢之

按紹安令武清歿後崇祀名宦武清自宋寇萊公隼後名宦止三人而紹安與焉其治績可知矣

馬焜高志字怡齋康熙庚辰成進士授山東邱縣知縣值歲饑勸賑寬徵民沾實惠以卓異行取不赴歸主持育嬰社棄

嬰全活甚眾著有古今文集

小石林文外焜致政後豪于詩賦嘗作催梅詩疊韻十餘首尚在推敲有鹽官僧果山呈詩五十首遂止其虛懷服善如此

盧生甫張志纂字仲山四歲喪母事繼母即解承志登康熙

丙戌進士授山東定陶知縣時值羽書旁午纖毫不以累民

定陶縣志生甫清慎自持愛民重士初下車值北征之役士民貢馬頗多驚疑生甫從容立辦邑有故家子弟破產遺差者數家積年逋賦號泣公堂多方救援永免其累以柔道治民不事峻厲士民懷之尋擢知州攝廣東

臨高縣戢奸剔弊海島風教為之肅清再舉卓異內陞刑部郎中進解律例稱

昔出知貴州遵義府部民有兄弟爭產者訐訟數十年生甫親鞫之

且曰吾無兄弟雖有產誰與爭者繼之以泣民亦感動以產

相讓遵義故老至今猶頌其德化時值清丈躬自履勘歲餘

以勞卒年六十有七生平端謹清慎家無儲蓄蕭然若處士

著有孝經注左傳八評漢書評林讀律質疑杜詩孟說東湖

乘受中編陸奎勳題仲山遺像詩友誼如膠漆師門共切劘酒香勤問字月白細敲詩治譜追三異清名凜四知羅蘭開滿砌
不讓嶺頭枝

楊標張志字赤城康熙丙戌進士選翰林院庶吉士生平恬

于仕進歸里後清操介節士林奉為圭臬總督嵇文敏曾筠

聘掌敷文書院講席課士外毫無干請四壁蕭然不以介意

學問淹貫制義力追正始卓然成家卒年七十五

嚴思位高志叅張志字西武號山鄰本沈氏以祖孝廉寅出

繼于嚴從其姓父嘗早歿母劉年纔十八遺腹生思位思位

奉母至孝家貧孤苦授徒以給甘旨勵志績學性超曠遇極

輒軻終不以爲累年六十五始登康熙己丑進士官翰林院

檢討在史館十餘年殫心供職癸巳恭遇

聖祖萬壽行養老禮

賜衣一襲碧色硯一方

思位記略康熙五十二年三月恭逢

六旬萬壽舉養老禮尚年不論爵公卿庶尹下至耆老皆得與焉斷

自六十五歲始吏部報名大學士以下三十餘人在籍來京

者五十餘人耆老四千五百餘人擇吉二十五日設宴暢春

苑自北而南百餘步爲一行東西列十五行辰刻

皇上屏法駕儀仗乘輦至門下設

御座

親王侍側

諸王皆遠立鴛序分班下接耆老比肩而坐人四爲一席觀者

如堵墻寂然無譁須臾

上命

諸皇子親賜諸臣茶酒各一盃以次而徧

諸皇子皆立以待飲有

台母下拜乃跪一足而受之

天顏和粹問有百歲者否大臣查冊得九十者十餘人

命跪至榻前

問履歷復

手賜酒一盃宴罷

駕回苑出白金賞耆老以壽為差一兩至十兩又有綠頭籤傳呼大

臣最後及位名共十五人歷門二重乃止內侍捧盤分三等

上等

賜帽袍套硯中等無帽下等止一硯位以卑秩叨與中等內侍前為

披衣謝

恩而出一時爭傳七品翰林與公卿比詫為奇事竊念位濫廁清華

碌碌無短長之効忝與華筵已屬望外更蒙

特賜實出奇逢

御衣腋下微有汗漬此

龍體所已御者聞解衣以待國士不虞下及小臣也龍池硯出口外

極遠之地堅可磨刃又名砥硯光滑如玉五色皆備位所賜

乃碧色製極精巧背云以靜為用是以永年圖書二體元主

人萬幾餘暇謹什襲藏之傳示子孫永永無極位馬齒已衰

行將請老感佩

知名士逾年告歸著有寧道堂文集仲子崇禮康熙丁酉舉

恩榮祖為紀述深愧蕪辭不克贊揚萬一云 丁酉主試廣東選拔多

人陸奎勳感舊詩渠閣芸編老自披歸休五稔
促騎箕巨源度勝從茲絕鄰笛山陽莫更吹

顧麒錫張志字作三號默堂康熙辛卯舉人除江南當塗知

縣善折疑獄興學校緩賦役政聲丕著解任歸課子孫以終

胡馬璣張志字近顏孝友淳樸家貧苦志力學康熙辛卯舉

人授廣東高明縣知縣興教化勤撫綏持法折獄不畏強禦

公餘把卷長吟不異儒素年六十卒于宦橐蕭然友人張

可大助貲得扶櫬歸

金南鎮高志叅張志字夏聲少為生員嘗校刻沈季友檇李

詩繫行世朱檢討彙尊稱為時賢所難以例貢授工部屯田

員外監督南新中南兩倉出納有法高安朱文端軾以清慎

平海縣志 卷九
薦陞刑部郎中出爲陝西驛傳道時方用武盡心徵調總督
年羹堯惡其梗直上疏劾之

世宗憲皇帝素知其能仍令供職尋內陞京堂告歸年七十卒孫樹
屏字玠堂由監生任河南衛輝府知府河決編竹筏渡災黎
水退設粥賑之尋罷歸起補直隸保定府通判卒于任
倪見龍張志字朝文康熙壬辰進士中書除江西上饒知縣
鄉闈分校拔楊錫紱爲名臣罷官主豫章書院講席人才多
所造就生平酷嗜典籍歸田後手不釋卷暮年目瞽猶背誦
五經左國史漢晝夜不輟尤精制義今散佚無存
施宗遠張志字廷樞幼失怙育于祖母楊康熙癸巳舉人授

湖廣羅田縣知縣邑地瘠民貧多草竊號難治宗遠立保甲
嚴緝捕廉得一二渠魁寘之法餘黨斂迹公餘進諸生論文
藝士風丕振以年老乞休士民愛戴數百里外攀轅祖送者
甚衆

鍾彞張志字尚殷康熙癸巳順天舉人授湖廣黃安縣知縣
以寬治民不輕試鞭扑絕苞苴剔姦蠹歸田後授徒自給生
平學問淵博文不加點著述甚富年八十餘卒有賓實叢書
十六卷蘿村雜誌四卷夷白堂詩稿十卷粵西漫遊集三卷
陸奎勳高志叅蘭玉堂集字聚緱號坡星思州知府世楷第
五子豐頤廣頤美髭髯早歲讀書力行隨叔父閣學棻于京

師名公鉅卿爭相引重按高志及蘭玉堂集皆云奎康熙已

亥江西巡撫白潢聘修通志時以諸生與查太史慎行同作

總裁庚子年五十八舉於鄉辛丑成進士選翰林院庶吉士

散館授檢討克明史纂修官白潢入相欲特疏薦擢固辭而

止尋告歸設帳講學弟子從遊日衆秀水朱檢討葵尊題其

居曰陸堂學者稱陸堂先生雍正庚戌浙閩總督李衛奉

勅修浙江通志奏以奎勲充總裁纂次詳悉今四庫書簡明日錄稱

其書較他志體例為特善甲寅主廣西秀峰書院創立學規

仿朱子白鹿洞遺意以疾歸弟子祖送者皆流涕而別平生

淡于仕進嘗訓弟子曰宇內不少科第少聖賢耳又嘗告白

相國陳封事則云今日上言須明義利之辨無庸摭拾瑣瑣

也少好談兵又精六壬學及星家言年四十乃一意經學諸

經皆有述作說經諸書風行海內卒年七十有六所著有陸

堂易學十卷今文尚書說三卷陸堂詩學十二卷春秋義存

錄十二卷戴禮緒言四卷魯詩補亡八代詩揆六卷唐詩安

帖體類編字音舉要陸堂文集二十卷陸堂詩正續集二十

二卷陸太史四書文別裁集陸堂穿穴五經皆有述作今人

花不礙心似鐵洵然

陸綸張志字懷雅號漁鄉檢討奎勲次子康熙丁酉舉人授

內閣中書轉典籍出為廣西梧州府同知巡撫金鉉延修廣

西通志欲以博學鴻詞薦固辭在梧職司配兌上不虧課下
不病民擢永州府知府時義寧綏寧苗蠡動大軍屯武岡自
承至武水陸兼程民多跋涉苦綸善調劑民安之丁父艱歸
起補梧州梧俗以婿爲子往往爭產致訟發婦多贅夫於家
前夫子與後夫子恒構爨綸曉以廉恥及異姓亂宗之律俗
乃革霽雨江漲壞民舍捐俸葺茅居之民謠曰河伯禍我太
守福我時于緇林書院講文課藝士風丕振改調歸綸少好
倚聲歸田後尤邃於詩工樂府王觀察勅聘修太平府志蕪
湖縣志詳核有體性孝友守梧時父奎勲主講秀峯書院迎
養官齋繪高陽小聚圖旣歸招兄載紀同居奉母課諸孫從

昆弟子姓貧者咸周卹之卒年七十一著有允齋詩集莞爾
詞子鈇字心之嘗捐貲贖宗祠官福建清流鐵石磯巡檢清
操自矢卒於任貧不能歸櫬同僚賻之乃得歸

按編次前後皆憑科第而綸科在奎勲前父子不可倒置
故特次綸於奎勲後

楊翊時張志字木臣少失怙依兄標讀書雍正甲辰舉人除
兩淮斜角場大使秩滿授廣東四會縣知縣邑豪奢矯以節
儉剔弊興利政聲卓然年老改鎮海縣教諭歸年七十卒翊
時以寒士兩任臚地處膏不染有古循吏風

馮巨欽張志原名鈿字愚堂太康知縣千英子雍正甲辰順

天舉人除四川南部縣知縣邑多囑嚕子好鬪健訟素爲民
害巨欽威德竝施姦匪屏跡修學宮創義塾上官重其廉能
委署保寧鹽茶同知卒于任年五十七

張鍾秀高志纂字鴻漸雍正甲辰進士授湖廣孝感縣知縣
首重文教朔望集諸生課其經學等罷職總督邁柱以湖廣
省志委輯稱精核志竣復襄陽知縣督撫以鍾秀肆應從容

題署襄陽知府蒞任未幾遂卒上官爲泣下貧甚總督以下
贈賻乃克歸葬著有過耳集詩稿

陸培張志字翼風號南香雍正甲辰進士授江南東流縣知
縣邑西蓮花洲峙江心水暴漲民失業培安撫之緩其征山

溪民又魚夜斃于石莫得克首主名培招衆予食察左手食
者目動一訊卽服署貴池革除胥役包糧嚴捕盜法每屆鎖
印輒郵致俸金分餽故鄉貧乏戚友罷官歸囊橐蕭然無以
謀饗殮僦屋以居爲諸生時善填詞歸里後肆力于詩洛如
壇坫推執牛耳數游維揚周旋於舟輿筇屐間篇什益多仁
和杭世駿錢塘厲鶚交口引重歷主東臺當湖九峯書院卒
年六十六著有白焦詞四卷

松江侍郎王昶列諸
江南二十四家之一

子錫周字

魯東乾隆丙子舉人

陸汝欽張志字恪庭雍正甲辰進士授湖廣湘潭縣知縣邑
豪猾爲暴鄉里鞫治置之法改温州府教授兼主東山書院

講席迎養父廣培于官舍以憂歸家貧養殮不繼杜門課子
晏如也尋卒

高衡張志纂字南岫號枝山文恪士奇孫父軒早世伯父與
卒于官

聖祖仁皇帝知與子尚幼

詔衡入都經紀其喪既至

召見昭仁殿諭曰爾仍如爾祖父伯父入內廷辦事續纂爾伯父所
纂之書時與纂駢字類編未成衡因奉

命續纂踰年書成命賫書回籍校刊既竣議叙七品京官補行人擢
刑部主事歷郎中出爲福建糧儲道清勤懋著署臬篆獄多

平反服闋需次補部員以疾請假歸嘯歌林下卒年六十七
沈廷陞張志字廉叔吳堡知縣宏勳子雍正丙午舉人以乾
隆丁巳明通榜除奉化縣教諭陞四川綿竹縣知縣量移納
谿撫字窮黎清廉慈惠考滿致仕歸廷陞工制義中年喪耦
不娶獨居一室木榻敝帷雖在官如儒生卒年七十六著有
硯還齋詩存四卷

林鑣張志字御驥雍正己酉舉人除福建鹽課大使補海澄
縣知縣澄濱海俗桀悍鑣以威德撫馭之創儒山書院振興
文教改青田教諭誘掖弗倦聞鄰邑有才士招與遊周其困
乏其人卒以才顯鑣尋歿於任

吳嗣爵張志纂字尊一號樹屏其先錢塘人祖之錡禮部主事始遷平湖嗣爵登雍正庚戌進士授禮部主事家宰張廷玉奇其才奏改吏部歷郎中授湖北學政調福建課士有法戊辰遷江南淮安府知府尋陞淮揚河道明年七月洪澤湖決高堰石工危甚總督高晉議開天然壩嗣爵曰此壩開誠足減暴漲然如下河各郡縣百萬生靈何堅持不放卒無恙晉江蘇按察使獄多所平反陞布政調湖南左遷宿虹同知量移淮徐河道戊子彭城黃水秋漲大溜直逼徐家莊縷堤幾濱居民倉皇謀竄時大風雨嗣爵撤蓋端生堤上身當其衝屬吏泣諫嗣爵曰吾河臣也堤潰吾不忍視民獨斃也迺

躬率吏集工堵築逾時而溜勢掣開仍歸中泓若神助然已而議放淤吏難之嗣爵曰安危在頃刻豈容坐失事機苟獲罪吾一人任之乃堅築月堤旣放淤水勢始平總督高晉以聞

上深嘉之擢河東總督山左運河爲輸漕要津發源汶水而匯泰安兗州諸屬百五十五道之水歲久淤塞疏濬如法漕運便之辛卯五月汶泗水溢入運堤汶上城幾沒七月丹沁伊洛諸水復發滙注入黃黃水出槽漫灘河南山左各工衝擊爲患皆設法搶護民賴以安事聞調南河總督遂自豐沛親抵海口徧歷江淮相度機宜加築臨黃縷堤疏濬雲梯關舊口

治清口東西壩高堰諸工先是

上幸清口詔遞添第四第五木龍後頭架癸巳嗣爵奏移建五龍

下以護新灘使黃水直逼陶莊清水抵惠濟祠後

上曰朕南巡時卽有此諭彼時河臣皆以為難故未行汝此事正

合朕意是年伏秋兩汛清黃三次盛漲徐州城不沒者三版嗣

爵開放傅家窪新挑勾引河匯入唐家灣引河以殺水勢二

日而平初揚州下河各州縣地處低窪遇洪澤湖漲分入下

河藉洩淮水田多被淹自嗣爵任事後十有餘年下河豐收

閭閻樂業

上賜詩褒美之

詩恭紀卷首

甲午八月黃水陡漲風雨暴作一夕泛溢

嗣爵急令集船以濟移民于高阜分給蘆葦為棲止計開倉

賑之民志稍定而身則晝夜處沮洳泥潦間遂得肺疾嗣爵

治河前後幾三十年全河形勢瞭若指掌而臨事持重審勢

扼要不為浮議所奪故能終始成功年七十轉吏部右侍郎

尋告歸卒于家

按嗣爵移家平湖已歷三世且子孫世為湖人並非寓居

于湖張志作寓賢非是今敬遵

大清一統志高士奇例作平湖人物改入列傳

張鈞張志字廣明幼績學夜燃燈讀書帳中帷布盡黑雍正

庚戌以五經成進士分發江南巡撫顧琮重其經學令掌紫

陽書院補金山縣知縣移清河歲飢設賑躬親巡視蝗蝻爲
患亟撲捕虔禱于神一夕驟雨驅蝗入海民賴有秋旋以捕
蝗病目乞改教職歸卒年七十二

牟江歷高志字西崑年未弱冠邑試兩冠軍補博士弟子員
精性理闡易義著蘆川試藝與同里范光寅舒原馬鏗應旂
善皆博學淹貫一時推爲名士雍正壬子同舉于鄉癸丑江
歷成進士乙卯聘充江南鄉試同考官稱得士旋與光寅等
相繼歿士林惜之

按是時鄉試聘鄰省舉人進士充同考官與今知縣相埒
故附列傳

許時木高志字德超生三歲而孤賴母朱撫之成立登雍正
癸丑進士授福建邵武縣知縣詳免虛糧三百兩有奇整理
樵川書院捐建拿口橋捍禦黃源虎患年四十卒官士民思
之

屈學洙高志叅海鹽續圖經字東萊由海鹽縣監生仕至雲
南大理府通判初入滇道經黃平州適有苗警寇氛甚惡商
旅不行從者皆股慄學洙毅然單騎至署人咸服其膽決整
飭苗疆三年奏績尋以解運京錢長途染瘴卒于江寧旅次
滇中人士感之祀名宦

袁珂高志叅張志字雪巖其先華亭人祖國梓官嘉興府知

府父勲遷平湖珂附貢生由正黃旗教習授河南儀封縣知縣儀濱大河歲派夫挑築民苦其役珂力陳得免建議鑿井灌田詳明漕項免徵本色民甚便之攝篆睢州斷屈八姦殺及屠戶二獄一時驚爲神尋入都引

見條奏兩河利弊甚悉

賜宸章及貂皮離宮錠等物陞陝州知州陝當五省孔道悉心整頓境內帖然濬治城內外水道引水溉田若干頃逾年免歸民遮道攀轅泣送者不絕其後河南饑刑部侍郎王士俊奉

詔發粟命珂專司賑事兼墾光山縣荒地數萬畝遂上疏特薦授兵

部員外歷刑部江蘇貴州二司多所平反擢山東兗州府知

府以熟諳部務改陞工部郎中乞假歸卒於道弟頊嗣子鑄頊字衷翼工詩善書以附貢生挑發河南初署陳州同知調裕州知州兼攝桐栢縣歷有治聲先珂卒鑄由監生選授湖南衡陽縣知縣

程本毓張志字秀山以貢授廣西梧州府通判歷署興業縣知縣象州知州攝梧州知府民苦浮糧累本毓丈地清糧抉剔隱漏革除飛灑擢直隸宣化府同知杜苞苴戢姦宄西陲方用兵以辦軍需強幹紀功尋請終養歸

李青張志字仿蓮乾隆丁巳進士授廣東普寧縣知縣植善鋤強移陽江嚴保甲肅清盜源改令直隸樂城興學校課田

疇設留養局賑粥撫綏流民以辦軍需勞瘁卒于官

胡涵張志字太初號梧村乾隆丁卯舉人授內閣中書出為

直隸廣平府同知改河西務地為南北水驛衝衢鄉人士過

其境必留署欵洽詩酒倡和年六十卒于任宦橐蕭然

馮廣譽張志字叔颺乾隆戊辰進士除廣西容縣知縣甫下

車有袖白金謁者峻卻之嘗夜分出巡宦家子方挾妓呼盧

呼至懲以夏楚聽獄平允不事酷烈容壤僻少文建書院興

文教以年老改處州教授修學宮勤講課乞休歸安貧不一

千有司卒年八十二

周錫龍張志字覲揚乾隆壬申舉人授湖北穀城縣知縣調

繁襄陽罷歸囊橐蕭然竭力奉親甘旨無倦色親歿哀毀卒

于苫次

錢大經張志纂字虞惇號敦堂父許淳家無擔石親自督課

大經幼承庭訓攻苦力學工制藝兼能詩年十三入邑庠領

乾隆甲子鄉薦考授中書丁丑成進士選翰林院庶吉士故

事庶吉士例不充同考官大經遇

特恩分校庚辰禮闈所拔如湖廣總督江南畢沅翰林編修江西

裘璘等皆一時名士散館授編修性謙和既貴尤抑然自下

在京請業者甚衆多所造就癸未卒于官

接近時餘姚志婁縣志皆統作列傳今倣史例惟仕宦八

列傳至前志傳文中間有遺事爲參考諸書備加臚列視
舊稍加詳焉其官階傳誤亦俱釐正

